




文粹

和
338
/0



利
296
10



文粹卷弟五十四

碑五

總六首表銘坊

吳興 姚鉉 纂



古跡

禹穴碑銘 鄭勛

麟臺碑銘 韋表微

圮橋石表銘 梁肅

土風

長沙土風碑銘 張謂

遺愛

淮南節度使尚書左僕射崔公頌德碑銘 李華

杜岐公淮南遺愛碑銘 權德輿

禹穴碑銘 井序

鄭魴

惟帝聖世時必有符命在昔黃帝始受河圖而定王錄必義得神

著而垂皇策堯配璇璣玉衡以齊七政舜繼成六德文王獲赤雀
丹書而演道定謨予亦以謂禹探魑穴得開世之符而後成厥水
功夫神人合謀而行變化天地定位陰陽潛交五行迭王斗建司
節岳尊山而瀆長川乃至日星雷風禎祥祕奧三綱五紀萬樂百
禮人人物各由厥生無非立功冥持至數昭合以及之者王者
奉天而行故聖神焉帝王焉彼聖如仲尼有德而無應故位止於
旅人福弗及生靈乃歎曰鳳鳥不至河不出圖吾已矣夫然後知
元命者軒告命者羲受命者曰唐與虞成命者禹備命者文仲尼
不受命乃假人事而言故有宗予之說後代無作焉立言者一仁
義以束世教瞽瞍蚩使絕其非望法業之外存而不論予讀夏
書無是說司馬子長自敘始云登會稽探禹穴不然萬禩何傳焉
惑矣蒼山之瀦呀如淵如陵徙谷遷此中不騫雨洗煙空蔚然莫
窮噫實禹迹之所始終唐興二百八祀寶曆景午秋九月予從事
于是邦感上聖遺軌而學者無述作禹穴碑廉察使舊相河南公

六米五十一

又上上池元

見而銘之曰

禹穴宜載夏與秦胡為而不載禹貢無說秦始皇游會稽李斯刻石亦不言古而不載
遷與鄭胡為而載始司馬遷自敘探禹穴而後乃製斯碑予以謂天德統萬
止言其蓋言其蓋萬物以生非談地德統萬止言其載言其載萬物以生也
堯德統萬止言其大傳云堯能則天之大小千川萬山皆禹之會讀為會一符
一穴禹穴藏五符統而不足為最故夏與秦俱不之載而人以之昧
雖山之堅雖洞之澁有時而堙有時而兌歲其萬千風雨濤汰亡
其嵌呀叢是醫蒼鄭與遷斯碑斯載斯時之賴

麟臺碑銘 并序

韋表微

夫聖人作然後王道明王道明然後瑞應至靈貺感通理合冥數
昔殷道剝喪民罔攸歸於是文王以有位之聖嗣成湯之德神人
咸乂故鳳鳴于岐洎周德凌遲道靡所屬由是仲尼以無位之聖
述文武之法憲章聿修故麟見於魯于時王室無主禮法盡去天
子之尊存乎位號魯周公之所封用四代之禮樂遺風故典鬱而

文萃五十四

二

未發仲尼以天縱之德生乎其中居周公之邦志文武之道觀廢興之運知作者在己位不得以庇生民權不得以司刑賞是天將喪斯民也而未喪斯文也乃綴絕緒申舊章變其禮文約爲典憲摯五常之龜鏡正三綱之軌轍帝王之道幽而復明盛德大業於是乎在天錫嘉瑞光昭厥功故周敬魯哀不得而有也由此觀之蓋春秋爲王法之器魯國爲王法所寄在其所寄以舉其器鼓仁義爲舟航權衰貶爲篙楫乘橫流之波濟天下之溺上無列國之輔下無陪臣之助故道不信於天下而信於智者法不著於當時而著於後代向使仲尼有滕薛之士得三家之眾興我王澤需及蒸民則麟出其郊得其所矣豈復厄於虞人哉故麟不見則孔聖之道不彰麟不死則周室之亂不極嗚呼聖人之生也得其時則化行乎江漢不得其時則道屈於季孟靈瑞之出也得其時則名薦於郊廟不得其時則身罹於殘天是聖人能順時以濟人不能反時以自聖靈瑞能因時以應感不能反時以自靈被厄於陳蔡

獲麟於大野影響之應其符著矣春秋傳曰有以告者曰有麇而一角者何孔子曰孰爲來哉孰爲來哉夫豈不知乎蓋殺之而不敢有故示人以疑之故也元和五年冬十一月表微以滑之從事使乎鄆陽停驂訪古經獲麟之舊壤且曰後之人築臺於此以旌厥德感先聖之不過俾麟出而非時徘徊道周乃作銘曰

二儀旣闢三象乃乖聖道壅鬱人心不開上無文武下有定哀吁嗟麟兮孰爲來哉周雖不綱孔實嗣聖詩書載刪禮樂大定懲惡勸善歸邪反正吁嗟麟兮克昭符命聖與時合化行位尊苟或乖戾身窮道存於昭豐邑栖遑孔門吁嗟麟兮孰知其昏運極數沒德至時否楚國寢廣秦封益侈墻仞迫阨崎嶇闕里吁嗟麟兮靡有攸止世治則麟世亂則麇出非其時麇鹿同羣孔不自聖麟不自神吁嗟麟兮夫復何云

圯橋石表銘并序

梁肅

臨淮之下邳有古圯橋蓋漢少傅留文成侯張良受神人黃石公

兵書之地初留侯醜秦高帝在豐龍虎不起風雲未會黃石公知
 天衢欲平否極必傾秦之亡而漢之昌故先以興亡之符而授留
 侯且曰孺子可教後得濟北黃石其我也故以號云夫受命之君
 與佐命之臣將欲敘天道定人倫則必幽贊明神協成大勳在黃
 帝氏方平蚩尤時乃玄女啟符風后行誅然後迎日推筴天下大
 治在帝堯方憂水害時乃洛出九疇禹成九功然後萬國底寧黎
 民時雍在漢祖方征秦項時乃黃石授兵留侯演成然後繼嬰軹
 道斬羽垓下自昔玄圖元命著在篆籀皆片言隱辭無益帝載惟
 此三后感及神書文章昭明大業用興易稱人謀鬼謀百姓與能
 又曰神道設教而天下服蓋謂是矣凡志不定則事不成謀不從
 則業不廣留侯不遭黃石無以定其志高祖不獲留侯無以廣其
 業人神參并漢道乃行不然何通降聖賢君臣遇合上得天統中
 為帝師如此其盛也大曆七年予旅游次墮履之地於是鑽石勒
 銘揚于邳圻庶恃力違天徼功妄作之輩于以儆戒之爾銘曰

陰陽之精不測曰神厥有黃石假形為人告謨留侯夷項滅秦跡
 寄穀城精還氤氳惟帝軒后肇興兵謀玄女降符實平蚩尤爰洎
 陶唐洪水橫流天乃錫禹洪範九疇亂秦紛如帝在草茅赫矣黃
 石亦命留侯丕顯有唐紹漢絕風革暴承天與軒比崇亦有反常
 貪亂圖功人神莫從動罔弗凶有開必先惟德乃同宜究茲道順
 于家邦作為紀銘永鑒無窮

長沙土風碑銘并序

張謂

天文長沙一星在軫四星之側上為辰象下為郡縣遁甲所謂沙
 土之地雲陽之墟可以長往可以隱居者焉其山麓山其水湘水
 其畜宜鳥獸其穀宜秬稻厥草惟繇蘭杜若荃蘅留萸藹車出焉
 厥木惟喬椅桐桂檉貞松文梓生焉篠蕩嬋娟於原野砥硤照耀
 於崖谷昔熊繹始在此地番君因之而後定王國焉至漢道凌遲
 董卓狼顧文臺以三湘之眾績著勤王梁朝覆沒侯景虎視僧辯
 以一州之人勳成定國桓文之舉亦何加焉至於致禮舊君請屍

歸葬桓氏之子可謂忠也殞身強寇有死無辱尹氏之女可謂貞也軾鄧粲之宅足以厚儒風表古初之墳足以敦素行齊魯之俗其何遠哉巨唐八葉元聖六載正言待理湘東郡臨江湖大抵卑溼脩短疵癘未違天常而云家有重腿之人鄉無斑白之老談者之過也地邊嶺瘴大抵炎熱寒暑晦明未愆時序而云秋有赫曦之日冬無凜冽之氣傳者之差也巴蛇食象空見於圖書鵬鳥似鴉但聞於詞賦則知前古之善惡凡今之毀譽焉可為信哉因徵故者之言用紀他山之石辭曰

舜去黃屋於焉巡遊禹逢玄夷於焉滯留五嶺南指三湘北流鄰聯滄浪邊遙响嶼湘山之下青青眾草有蕙有蘭在江之島煙雨冥冥波瀾浩浩不采不擷棄捐遠道湘山之上青青眾木有栝有松在巖之麓風霜淒淒柯葉沃沃不棟不棟老朽空谷陸有玉璞水有珠胎隋侯云亡卞氏不來湘雲莽蒼湘月徘徊貞石紀事層城之隈

淮南節度使尚書左僕射崔公頌德碑銘 并序

李華

在昔召公相武王除害去虐敷命帝庭周公佐成王卜洛定宅登頌清廟奉康王會朝豐宮克致太平惟崔公相立宗保寧聖德鎮安天下輔肅宗埽除凶穢紹享天命事今上振宣明威撫綏淮海惟申伯翊宣王登南邦興周室小白率諸侯征楚翟奉王職與崔公叶德同勳皆姜姓也夫議盛德論大功贊大賢舉其殊倫卓然昭明不書其細申大體也故詩陳方叔之烈曰方叔元老克壯其猷又美韓侯之封曰有倬其道韓侯受命今述崔公亦不名不備官古之制也後魏尚書亮八代至公海內首族人倫德範公少負文學重名且兼宏略揚于王庭甲科入仕歷京兆倉曹參軍再遷司勳員外丁太夫人憂以毀聞終喪拜刑部員外兼侍御史知劍南節度留後事逆臣起幽陵陷潼關至尊哀兆人思古公避狄之義於是帝車西南依我心膺拜中書侍郎平章事劍南節度採訪

使玄宗克讓聖子家爲唐虞公出納王命至于朔方弼諧二聖孝
慈光明自西自東殄殲元惡天討之歸宥如山行冠若霜藁鼓燎
無存帝曰爾圖實叶朕志官中書令封趙國公公拜手稽首臣敢
上冒以負天命帝遂其高俾作少師師訓東宮兼長邦憲居守
洛京乃傳濟王又典汾州王德日宣汾州阜安乃統江淮主三軍
督萬人加工部尚書時征鎮之司恃勳奸令公獨露奏隱用輟興
轉吏部淮南旣清軍有餘逸夷難江南萬里康哉六歲在鎮心馳
王幄戀慕之極至于流涕獻章請朝帝恩降允公不俟駕建旆將
馳耆耄泣訴吏人遮道卽日詣闕乞留者三百餘人公申論而行
至于京師天子大悅曰趙國先帝元臣嘗爲朕師自我不見于今
六年有司如朕意待之加尚書左僕射遂淮南之請所部八州人
舞手蹈足祕書少監兼廬州刺史長樂賈深有文武才略忠于王
室推心馭下嘉績昇聞戴公仁明思揚盛德合肥令彭城劉商先
后之族臨人惠和一州之老幼咸曰我州我邑敷王德澤崔公封

內我是以安其仁不銘其德不可謂華嘗忝公游客以爲頌夫五
岳視三公四瀆視諸侯公入掌三公之政出踐諸侯之長昔鄭武
公爲卿士詩人賦緇衣魯僖公爲周賢侯史克頌駟野敢附前烈
以書公不朽故褒大臣則王室尊崇美政則王命行不惟頌公尊
天王也今載公朝覲之禮以弘大之其文曰

思崔公出鎮之崇克孝克忠宣帝之武恢帝之功自蜀自朔至于
秦宮出納大命決事于衷思崔公烈烈郁郁以豈以肅乃統淮服
洎江之隩闐闐長轂霞施霜鏃蠢爾兇毒罔不顛覆思崔公三世
元臣德綏生人乃朝于王王顧殊倫且曰東南飲化如春爲朕腹
心寧其咏吟思崔公入覲于王鸞聲央央佩玉以錦秉珪奉璋公
復于揚四牡其驥公慕彤庭涕濡于裳思崔公廬江州邑孰不垂
泣我公之還陽和起蟄乃求樂石樂石爰立刊之頌之介福攸集
介福攸集州人斯及

杜岐公淮南遺愛碑銘并序

權德輿

通天下之志者在大君元臣之感會而已成天下之務者在知人安人之教化而已孝文御寓貞元十九祀統燭羣生德侔往初建用皇極澤流萬國淮南節度觀察使左僕射相國杜公政成人觀迺三月壬子朔登拜司空秉鈞居中閒一歲上皇承末命越八月皇帝受神器弼亮三聖謨明九功當冢宰總己之任護崇陵因山之制盡董經費以頒地貢乃作司徒式和人則進封岐士命賜備厚均齊天下之政茂遂萬物之宜遵道弘化匪躬宣力中外之重必歸於公初公之入輔也制詔副節度使兵部尚書王公爲左僕射代居師帥州壤鄉部鰥孤幼艾蒙公之化也久感公之惠也深鬱陶詠歎願刻金石王公累章上請公輒牢讓中止至是復以邦人不可奪之誠達于聰明且用季孫行父請史克故事故德輿得類其話言而鋪其馨香云公字君卿京兆杜陵人不書名尊大臣也清明廉直溫毅弘重易簡之道本於健順忠智之謀發爲事業慮善以動得時大行其初筮仕州府交辟韋尚書元甫實爲已知

始自掾吏累爲命介盈庭鬪辯積歲疑留者片言以聽斷含冤自誣具獄論殺者覆視而全活江介吏師以爲神明由殿中侍御史轉主客員外郎工部郎中再爲撫州刺史以御史中丞領容州刺史經略使入爲金部度支二郎中復兼中丞超拜戶部侍郎出爲蘇州刺史屬受代者以憂闕換饒州刺史明年以御史大夫領陝州刺史嶺南節度觀察使徵爲尚書左丞復以御史大夫領陝州長史陝虢都防禦觀察使歲在庚午以禮部尚書至于是邦禹貢淮海之域職方東南之奧產金三品射利萬室控荆衡以浚泛通夷越之貨賄四會五達此爲咽頤初公之至也歲丁驕陽人有菜色於是息浮費以悅之蠲雜征以利之夫家之稅有冒沒者免其罪以購之廢居之豪有委積者盈其直以出之瀕海棄地芟芻填淤一夫之勤百畝可獲終古遺利沛然嘉生成於指顧得以蕃殖先是營部未葺困倉未完介夫半寓於神祠公聚或委於支郡公乃慮材用量事期輯中權規大壯百堵皆作三軍寧宇轅門言言

夏屋耽耽可以張射侯可以容宴豆爰居爰處而武備修矣巨廩
崇構翬飛雲矗縮以板幹積如京坻得蓋藏之宜協出入之制多
黍多稌而禮節行矣連營三十二積穀五十萬工以悅使人以樂
成又瀦雷陂以溉稽地醜引新渠匯于河流皆省功費而弘利澤
俄授左揆竟參大政加徐泗濠等州節度使先皇帝在宥天下推
恩彭城顧懷舊勞復命其嗣使得以州師建節而公以二郡進律
惟公鎮定一方心平德和言仁必及人言智必及事生聚教訓勤
身急病視闔境如棖闈之內撫編人有父母之愛因其習俗而均
安之識其慘舒而導利之仕六朝而時推元老踰二紀而再掌邦
賦揚美化於方志流淑聲於命書其牧臨川也地參閩蠻人本輕
惰化彼游手敏於農功堅舊防而時其蓄泄當大旱而我有雲雨
每歲徵令歸諸有司克變輸將之勤不虧公上之人因獲贏利悉
賙困窮其總司計也權重輕以平物力受比要以均財征厚生而
不匱量入而有節當一人注意之重盡三接沃心之言宰司沮傷

不得久處其鎮南海也服嶺阻深族類猜害塗巷狹陋燹埃接連
忿憶相困鬱攸斯作公乃脩伍列闢康莊禮俗以阜火災自息南
金象齒航海貿遷悍將反覆遠夷愁擾吏困省貪商久阻絕公乃
導其善利推以信誠方船繼至百貨錯出邕部絕徼裔人自擅誘
掖招徠以威以懷朱崖黎民保險三代種落盤互數犯吏禁公麾
偏師一舉而平獷俗率化原人得職其登左轄也紀律脩明清萬
事之本其理分陝也惠綏浹洽弘二南之化必宿其業而脩其方
崇庸大績其昭昭如是而又博極書術詳觀古今謀王體斷國論
其言有章聽者皆竦作爲通典以究理道上下數千百年閒損益
討論而折衷之佐王之業盡在是矣公之先在漢則建平敬侯有
立宣之功在晉則當陽成侯決平吳之策忠力雋賢寢明而昌以
至曾祖諱行敏皇銀青光祿大夫荆益二州大都督府長史南陽
郡公王父諱懋尚書右司員外郎麗正殿學士烈考諱希望歷鴻
臚卿御史中丞再爲恒州刺史代鄯二州都督西河郡太守襄陽

縣男贈尚書左僕射惟南陽德化茂于列藩惟右司文雅重於中
臺惟僕射有文武器任克揚風績其督鄴州總節制留府數與虜
碯奮其威謀奪鹽泉吞河曲城便地置新軍剖符惠人理行第一
以先大夫代德丕烈之若是公能聿脩而弘大之憑厚貽慶爲不
誣矣居鎮十三年願脩覲謁拜章十上西嚮涕洟上難其繼慰勉
而已公以述職在於庇人納忠在於薦賢密疏請以王公爲代詔
爲之貳暨公之至也由大司寇爲大司馬以副車戎裝伏謁和門
禮容渥命寵耀藩服介圭得請丹轂載馳勳籍裨校乞留遮道初
諭以溫顏終肅以軍法旣告令尹之政卒獲子牟之心詩曰布政
優優百祿是遒又曰神之聽之式穀以汝則岐公永享鮪耄如岡
如陵不待瞽史而前知矣惟王公師長論道如公之位阜俗撫封
如公之心且以斯人嚮慕三歲愈甚大懼公之功德寢而不章初
撫人廣人皆鏤堅石以攄盛烈及茲而追琢者三矣古所謂立信
讓以涖百姓則人之報禮重其在是乎銘曰

惟天惠人惟辟奉天利建元侯于藩于宣文武杜公端誠絜矩化
洽陝服聿來茲土闢我烏鹵長我禾黍乃建營部乃新廩庾成師
足食比屋安堵里閭熙衍沃膺膺十有三年慰安斯人雪泣抗
章血誠上陳結戀明庭不私其身樹善交代如公之仁考祥視履
宜錫蕃祉寅亮三朝是毗是倚密勿中樞矢其謀謨乃升司空亦
作司徒九賦旣平五教式敷中外之重惟公是圖彼都人士飲公
之德彼土樂康繫公之力永言介福祝我岐國稽合聲詩于胥筮
刻彼泉斯實彼石斯泐公之德輝永永無極

文粹卷弟五十四

文粹卷五十五上

吳興 姚鉉 纂

碑六

總六首廟記碑陰附

貞義

溧陽瀨水貞義女碑銘 李白

姦雄

項籍碑銘 李觀

英傑

諸葛武侯廟碑銘 尚馳

蜀丞相諸葛武侯祠堂碑銘 裴度

諸葛武侯廟記 呂溫

刻武侯碑陰 孫樵

溧陽瀨水貞義女碑銘 井序

李白

皇唐葉有六聖再造八極鏡照萬方幽明咸熙天秩有禮自太古

及今君君臣臣烈士貞女采其名節尤彰可激清積俗者皆埽地而祠之蘭蒸椒漿歲祀罔缺而茲邑貞義女光靈翳然埋冥古遠琬琰不刻豈前脩博達者爲邦之意乎貞義女者溧陽黃山里史氏之女也以家溧陽史闕書之歲三十不移其志清英絜白事母純孝手柔荑而不龜身擊漂以自業當楚平王時平王虐忠助讒苛虐厥政芟於尚斬於奢血流于朝赤族伍氏怨毒於人何其深哉子胥始東奔句吳月涉星遁或七日不火傷弓于飛逼迫於昭關匍匐於瀨渚捨車而徒告窮此女目色以臆授之壺漿全人自沈形與口滅卓絕千古聲凌浮雲激節必報之讎雪誠無疑之地難乎哉借如曹娥潛波理貫於孝道聶姊殞肆槩動於天倫魯姑棄子以卻三軍之眾漂母進飯沒受千金之恩方之於此彼或易爾卒使伍君開張闔閭傾蕩郢鄢吳師鞭屍於楚國申胥泣血於秦庭我亡爾存亦各壯志張英風於古今雪大憤於天地微此女之力雖員爲忠孝之士亦焉能咆哮烜赫施於後世也望其溺所

愴然低迴而不能去每風號吳天月苦荆水響象如在精魂可悲惜其投金有泉而刻石無主哀哉邑宰榮陽鄭公名晏家康成之學世子產之才琴清心閒百里大化有若主簿扶風竇嘉賓縣尉廣平宋陟丹陽李濟南郡陳然清河張昭皆有卿才霸略同事相協緬紀英淑勒銘道周雖陵蹟海竭文或不死其辭曰
粲粲貞女孤生寒門上無所天下報母恩春風三十花落無言乃如之人擊漂清源碧流素手縈彼潺湲求思不可秉節而存伍胥東奔乞食於此女分壺漿滅口而死聲動列國義形壯士入郢鞭屍還吳雪恥投金瀨汜報德稱美明明千秋如月在水

項籍碑銘

并序

李觀

鋪周秦之顛亡粲乎簡冊吁可駭也惟秦失在暴惟周失在弱上慢下驥政無紀綱若然者神靈不得不哀世教不得不張且天地不可以無主故帝必誕眷命不可以坐得故有心者經綸於是漢祖起於豐沛公起於會稽陳吳之徒自稱乎假王其餘揭竿而呼

爭先刺秦者如林如藪于時亂浩浩兵憧憧風從虎雲從龍三靈昏而四海空公乃杖撥亂之劔希當世之功浮江而西有壯士八千枹鼓于舟中吁嗟乎無人誰禦乎羣兇所以謀大業拯萬靈而爭雌雄者獨漢祖與公遂號百勝之師趨累卵之危活趙歇擒王離十壁愕眙一麾靡餘然後飄銳氣聳利鋒扼秦關怒漢公因語曰捐約則違人固信則自違惡取乎乃軍鴻門屠咸陽峙于神州幅裂于四方始退與漢祖東西而王天下是以知量不足謀不長矣然雖兵眾於漢戰捷於漢其後則有靈壁之敗太公虜滎陽之圍紀信焚廣武之守傷其胷長陵之役撓其師與漢祖龍虎相逐干戈合離五年之後而勝敗乃知是知兵之不可窮物之不可終天地否而開雲雷屯而通故有三將潰圍孤軍曷歸良馬在御美人在帷楚歌夜聞哀泣垂綉遂飲帳中申令麾下鏡分美人廳舉良馬曉漫漫雲茫茫失道於陰陵問津於烏江其猶魚遭網而游鳥嬰羅而翔終不免矣尙能合從亡之人禦追逃之兵旗鼓指

掌鵝鶴邱陵足罔不蹙首胡不橫然始解馬於舟子結纓於死地痛矣夫何自慷慨斯焉之甚邪而曰天實亡我非戰之罪何執而不寤哉公實勇而無謀剛而無親忌而信讒暴而殘人是以人得蹈其資兵得害其身真自亡也豈天亡乎使公勇而能謀關中可據矣剛而能親諸將不攜矣明以察讒奇計得施矣怒而愛人百姓樂推矣若然則舉天下如轉圜何漢氏與二臣能計之哉至如謀於漢者昔其臣也公實棄之兵於漢者亦其將也公不庸之故曰得人者昌失人者亡噫從始而言之蓋天理有素乎故生項以靜難生漢以牧人靜難者授勇牧人者授仁不然何鴻門阼而復持成皋跳而復振入關而緩來王楚而驟歸者哉釋名曰碑悲也觀嘗尋楚漢春秋見公帳中之歌而詠之輒泣然而悲爰刻石爲文多不究其終始銘曰

姬孱而絕羸虐而滅九陽鬱結九州龜臲必生聖哲以起滅絕維漢自豐維楚自東偕伐寇戎反相戰攻戰攻不罷泊乎垓下彼眾

我寡龍死于野

諸葛武侯廟碑銘 并序

尙馳

漢代之季天下不得不三分蓋有由矣曹氏挾王室之威重孫氏藉父兄之餘業劉氏獨不階尺土開國於亡命行旅之閒天贊一武侯卽鼎足之勢均也公諱亮字孔明身長八尺嘗躬耕隴畝好爲梁甫吟雖經綸之材隱括未用而寥廓之志舉措輒形旣先主扶世奠民渴明智用謀之佐致三顧見咨當代之畫公於是輕重中夏揣摩全吳定王業於智心決神機於掌握由是身爲先主所起計爲先主所用自北徂南周爰執事夷險平亂靡所不之卒使劉氏以岷峨之地爲己封梁益之人爲己蓄曹操不敢以兵強驟進孫權不敢以境闊妄動彼相之力焉屬先主創業未半中道而歿遺詔邦家之事大錄于公救後主事公如事父至於職爲臣行令如君其名近嫌也位爲君事臣如父其形近猜也不然豈周公賦鴟鴞之詩成王啟金縢之誥此雖大小有異託付不殊竟能上

不生疑心下不興流言苟非誠信結於人格於神移於物則莫能至是公復總戎仗律無歲不征將繼舊邦之業用復先君之命所以南擒孟獲而不殺志在綏戎狄矣西拔祁山而不賀志在吞河洛矣役木牛流馬濟人之力已紓矣制陣圖兵法敵國之軍可翫矣故得三關不封二邦喪氣大勳未集行師而殞戎夷野祠毗庶巷祭遺愛所使豈求而得之噫國之將亡本必先顛且以蜀之連山峻極其險不爲公死而平沃土富饒其利不爲公死而薄甲兵士卒其眾不爲公死而減府藏穀帛其富不爲公死而貧及鄧艾揚聲於前鍾會躡跡於後滅蜀三十萬戶如撓羊羣劉禪竟不免面縛壘門身爲降虜天事歟人事歟天事遠吾不知之矣以人事而論使武侯常存隱若二敵國勝於本朝百萬之師北向爭衡司馬懿復惕息而不敢戰足明中原非曹丕所有也舉其大略眞命世之雄未可以身許小國之君延霸王之佐因曰才有所詣不逮前賢向令伊呂並世而生殷周易地而處則太甲不放桐宮而四

海咸理諸侯不誓孟津而天下大定但爲天不假年志畫莫就生居於後功績在其下耳然非先主之識武侯或不能輔成於王業使百代令君用人必由此道欲使社稷不振賢智逃於藪澤其可得邪公死之日遺令葬漢中定軍山祭法曰法施於民以死勤事以勞定國則祀之至今官書廟食成不刊之典一山之內每有風行草動狀帶威神若歲大旱邦人禱之能爲雲爲雨是謂存與沒人皆福利生死古今一也死而不朽反貴於生銘曰

漢室大壞埽地無依人心各動天命未歸角力爭負有翼者飛突兀臥龍吟嘯待時一論世事超拜軍師魚水相得生死以之仗順收兵行權略地氣蓋全吳智吞大魏國政成三人臣莫二乃建社稷興王之器旣得武侯颯魏都敵國未滅謀臣已殂大本去矣不降得乎荒墳四積拱木皆枯尙餘精爽能禁樵蘇人生異代仰止山隅

蜀丞相諸葛武侯祠堂碑銘 并序

裴度

度嘗讀舊史詳求往昔或秉事君之節無開國之才得立身之道無治人之術四者備矣兼而行之則蜀丞相諸葛公其人也公本系在簡策大名蓋天地不復以云當漢祚衰陵人心競逐取威定霸者求賢如不及藏器在身者擇主而後動公是時也躬耕南陽自比管樂我未從虎時稱卧龍詩曰潛雖伏矣亦孔之炤荆州按苑英華辨證荆州作故州謂亮與崔州平徐庶友善也 平心與元直神交泊乎三顧而許以馳驅一言而定其機勢於是翼扶劉氏纘承舊服結吳抗魏擁蜀稱漢刑政達於荒外道化行乎域中誰謂阻深殷爲強國誰爲遜脆勵爲勁兵則知地無常形人無常性自我而作若金在鎔故九州之地魏有其七我無其一由僻陋而啟雄圖出封疆而延大敵財用足而不曰浚我以生干戈動而不曰殘人以逞其底定南方也不以力制而取其心服震攝諸夏也不敢角其勝負而止候其存亡法加於人也雖死徙而無怨德及於人也雖奕葉而見思此所謂精義入神自誠而明者矣若其人存其政舉則四海可平五

服可傾而陳壽之評未極其能事崔浩之說又詰其成功此皆以變詐之略論節制之師以進取之方語化成之道不其謬歟夫委棄荊州不能遂有三郡此乃務增德以吞宇宙不黷武以爭尋常及出斜谷據武功分兵屯田爲久駐之計與敵對壘待可勝之期雜乎居人如適虛邑彼則喪氣我方養威若天假之年則繼大漢之祀成先主之志不難矣且權傾一國聲震八紘而上下無異辭始終無愧色苟非運膺五百道冠生知曷以臻於此乎故立德知人之明者倚杖曰魚之有水仲達姦人之雄者嗟稱曰天下奇才度每迹其行事度其遠心願奮短札以排羣議而文字蚩鄙志願未果元和三年冬十月聖上以西南奧區寇亂餘孽罷眊未息汚俗未清輟我股肱爲之父母乃詔相國臨淮公由秉鈞之重承推轂之寄戎軒乃降藩服乃理將明帝道陬落綏懷溥暢仁風閭閻滋殖府中無留事宇下無棄才人知嚮方我有餘地則諸葛公在昔之治與相國當今之政異代而同塵矣度謬以庸薄獲參管記

隨旌旄而爰止望祠宇而修謁有儀可象以赫厥靈雖徽烈不忘而碑表未立古者或拳拳一善或師長一城尙流斯文以示來裔況如仁之歎終古不絕其可闕乎乃刻貞石庶此都之人存必拜之感云爾銘曰

昔在先主思啟疆宇擾攘靡依英雄無輔爰得武侯先定蜀土道德城池禮義干櫓煦物如春化人如神勞而不怨用之有倫柔服蠻落鋪敷涓濱攝跡畏威雜居懷仁中原旰食不測不克以待可勝允臻其極天未悔禍公命不果漢祚其亡將星中墮反旗鳴鼓猶走司馬死而可作當小天下尙父作周阿衡佐商兼齊管晏總漢蕭張易代而生易地而理遭遇豐約亦皆然矣嗚呼奇謀奮發美志天遏吁嗟嚴立咸受謫罰聞之痛之或泣或絕甘棠勿剪駢邑斯奪繇是而言殊途其轍本於忠恕孰不感悅苟非誠慤徒云固結古柏森森遺廟沈沈不殄禋祀以迄于今靡不駿奔若有照臨蜀國之風蜀人之心錦江清波玉壘峻岑入海際天如公德音

諸葛武侯廟記

呂溫

天厭漢德俾絕其紐羣生墜塗四海飛水武侯命世實念皇極魏
姦吳輕未獲心膺南陽堅卧待時而起三顧雖晚羣雄粗定必也
簞埽是資鼎立變化消息謀成掌中龍戰立黃再得雲雨於是右
揭如天之府左提用武之國因山分力與水合勢蟠巨萬里張爲
龍形亦欲首吞咸鎬尾束河洛翼乎中夏飛躍天衢然後魚驅句
吳東入晏海大勳未集天奪其魄至誠無忘炳在日月烈氣不散
長爲風雷英雄痛心六百年矣於戲以武侯之才知己託國土雖
狹國以勤儉富民雖寡兵以節制強魏武旣沒晉宜非敵而戎車
荐駕不復中原或曰奇謀非長則斬將覆軍無虛舉矣或曰餽糧
不繼則築室反耕有成算矣嘗試念之頗蹟其原夫民無恒歸德
以爲歸撫則思虐則忘其思也不可使忘其忘也不可使思當漢
道方休哀平無罪王莽乃欲憑威寵造符命脅之以威動之以神
使人忘漢終不可得也及高光舊德與世衰遠桓靈流毒在人骨

髓武侯乃欲開季世振絕緒論之以本臨之以忠使人思漢卒亦
不可得也向使武侯奉先主之命告天下曰我之舉也匪私劉宗
惟活元元曹氏利汝乎吾事之曹氏害汝乎吾除之俾虐魏偏從
之民聳誠感動然後經武觀覺長驅義聲咸洛不足定矣奈何當
至公之運而強人以私此猶力爭彼未心服勤而靡獲不亦宜哉
乃知務開濟之業者未能審時定勢大順人心而克觀厥成吾不
信也惜其才有餘而見未至述于遺廟以俟通識唐貞元十四年
七月二十五日東平呂溫記

刻武侯碑陰

孫樵

赤帝子火熾四百年天厭其熱洎獻燼矣武侯獨憤激不顧收死
灰於蜀欲噓而再然之艱乎爲力哉是以國稱用武岐雍閬地不
尺闕抑非智不周天意炳炳然也夫以武侯之賢寧靡籌其不可
邪蓋激備隆中以天下託不欲曲肱安穀終兒女子手將驅馳死
備志邪由是覈武侯之所爲殆庶幾矣然跨西南一隅與吳魏抗

國提卒數萬綽綽乎去留無我枝者是亦善爲兵矣史壽以爲短於應變真抑武侯哉俾武侯不早入地曹之君臣將奔走固圍之不暇鍾鄧寧能越巖懸兵決勝指取邪是井絡之野與武侯存亡俱矣天殲武侯其不愛劉愈明白甚姜維何力焉曩蟠南陽時人不與仲毅伍洎受社稷寄擅刑賞柄曾心不愧畏人不疑黷何意氣明信卓卓也武侯死五百載訖今梁漢之民謠道遺烈廟而祭者如在其愛於民如此而人也獨謂武侯之治比於燕爽彼屠齊城合諸侯在下矣

文粹卷第五十五上

文粹卷第五十五下

吳興 姚鉉 纂

碑七 總四首墓銘墳

妃主

唐和麗妃神道碑銘 張說

唐鄖國長公主神道碑銘

唐岐陽公主墓誌銘 杜牧

唐東光縣主神道碑銘 李華

唐和麗妃神道碑銘 并序

張說

舊史云軒轅帝宮次星具黃龍之體郊禱神祀次妃成立鳥之命非聖也莫能法天非天也莫能感聖則有相乎坤而母乎震齊乎古而合乎天跡雖祕絕猶可測而言焉麗妃趙氏天水人也麗者以華美爲貴妃者以配合爲尊易云日月麗天傳稱星辰合度麗加妃號自我爲初原夫八駿覲周肇有封姓三軍霸晉乃蕃卿族

設寶符而開國曳珠履而承家果驗成宜之後不乏文忠之慶堯
門昭殿何代無人暨乎紫氣上通瑤臺獨立楚宮選美納良袂於
神雲漢掖求才進團扇於明月故坐而論教則比位三司動而具
瞻則儀刑六列者矣先將軍以恩澤授職太夫人以有禮封鄭流
車躍馬豈無甲觀之親湫宅閒門不有椒房之勢探風揆化憂國
如家故聖人有以尚其德也躬親繭館義形熊檻退席以愛禮樛
木以廣恩望古難臻之地必為常踐之域故聖人有以嘉其志也
懸象告沴經時寢疾在蒙被之辰答還輦之問生可捐於浮假心
獨係於玄真神住上清願承恩而人道形歸下土期去禮而薄葬
慈顏同氣奚敢為言皇上閱而許之咨嗟不已開元十四年春秋
三十有四七月十四日薨於春華殿殯於龍興觀之精屋示以出
家從道例也命河南尹監護河南令副焉喪葬務約成遺語也二
十六日窆於故都之後邙山之陽孺慕承華悽涼薄室列薤歌於
東路迴容衛於北山壽堂一閉兮凡聖等人代同悲兮脩短開月

帔雲衣襪以神仙之服上方陶籩旋於造化之初此皆聖主之曲
成賢妃之本志何必雲陽山下別起通靈之臺未央宮中虛立致
神之帳若夫易名之典考行是存帝諡曰和禮之貴也氣之和者
生萬物聲之和者孕八音魂而有知感聖恩乎有詔史臣恭銘內
職事出彤管辭無華飾寫樂池之永傷寄瑤山之罔極銘曰
帝妃佐后實掌陰教八月選才千金聘貌禮獻絲繭詩脩澣濯婦
政可尊嬪風胥效皎皎漢女為皇降靈娥娥那媛順道之經結以
印綬華光後庭帶之弓鞬朗潤前星退迹潛運夙承嘉獎謙苦中
京崎嶇上黨金鏡開目明珠耀掌心方樂於時秦魂奄悲於化往
紫雲衣兮霓裳送美人兮北邙白壤宮兮青松苑去君恩兮日遠
秋風急兮霜天草木黃兮野田滅香容於空柳留畫像於甘泉春
秋以麗和之二字獨褒美於千年

唐鄜國長公主神道碑銘 并序

臣聞堯有娥英承九族之敦敘舜有宵燭動百里之光耀大聖之

後天必縱之積善之家神所慶矣豈惟上帝之女雲漢爲靈平王之孫肅雍其德連華前志世有其人皇唐郎國長公主者睿宗之第七女也母曰崔貴妃構累聖而成門合濟美而爲室蘊乾坤之純粹演日月之清明神媛誕靈常言所絕免懷之歲天奪聖善不食三日哀比成人文母流胎教之慈曾子得生知之孝由是宮闈延矚邦國遠聞及乎玉笄耀首油駢在馭錫之美地邑以荆山求之令族嬪于薛氏爾其居翫圖史動修法度服其澣濯恭儉之教興鼓其琴瑟敬讓之風被其行己也安親惠下之謂仁敬宗好合之謂義降貴接卑之謂禮恕情周物之謂智推心而行罔不該備其理家也侍膳饗餼之均和主饋醴醢之品齊絲竹五音之徽靡纂組九華之縟麗經目所涉莫不精詣每至三元上賀五日中參進對詳華折旋舒婉故以式瞻貴里儀範通門如千花之汎惠風百卉之涵膏露窈窕之儀克舉蕃衍之福大來有男子四女子五瑤碧生階芝蘭滿室者也習禮明詩日漸庭闈之訓銀章艾綬地

連恩澤之侯自先朝徹辰之辰迄公主成笄之日外除過制內疚餘哀手寫金字梵經三部躬繡綵線佛象二鋪貝葉眞偈現心相於銀鈎蓮華妙容呈意生於玉指孝思惟則道遠乎哉開元繼明推恩由己進封郎國長公主食邑一千二百戶田賦廣而彌儉禮秩尊而益恭其後君子晨歌夫人晝哭未亡爲稱生意盡矣撫視遺孤將守柏舟之誓志期雍落永從柰苑之游朝制斷恩改降鄭氏陵谷可移隋和之德不昧寒暑有遷松筠之性如一均養七子麻廕二宗汾陰之室忘亡滎陽之黨相慶旣而善福虛應寢疾彌留盡國醫之伎遠方畢至供御府之藥中使相望命之必至不可枝也堂邑山林忽焉瘁色平陽歌舞適足愁人開元十三年二月庚午薨於河南縣之脩業里春秋三十有七震悼紫庭哀傷朱邸傾家若墜舉國同悲有詔光祿卿孟溫禮監護喪葬京兆尹馮延休副焉窀穸之禮一如涼國公主故事夏四月恩旨陪葬於橋陵不耐不從古之道也皇上念同氣之致美感闕川之永謝恨棣華

之半缺悲瑤草之先化乃命國史昭銘懿迹降恩禮於雲露寫哀辭於金石水非湘渚還起帝子之祠山是洛陽卽封天妹之冢銘

曰

帝系白雲仙源紫氣漲家成國承天作貴赫赫聖祖曰文曰武皇
皇睿宗一變萬邦挺生淑媛慈和孝恭清曠如神蛾眉無雙邸第
立官湯沐建封爰及笄總禮施環佩鳴鳳獻祥乘龍擇對帝唐降
女天乙歸妹珠玉過庭蘋蘩正內蛟門早聞龍湖忽上無地何載
無天何仰金澱書經華絲繡像欲報之德昊天罔極孰是言歸良
人永違銀爐煙斷羅幕霜飛懇願毀形託身壞衣不諒人只改嬪
他士稟命曰從從人曰順息媯繩楚懷羸霸晉反經合權與道同
韻煥休二室均歡等潤四海謐清九族和平萬物向榮眾鷦未成
心戀盛明形隨落英祖載鼎城歸窆咸京挽歌敷聲鹵簿凶行哀
哀聖情惻惻同生橋山片石千秋合名

唐岐陽公主墓誌銘

杜牧

憲宗皇帝卽位八年出嫡女冊封岐陽公主下嫁于今工部尙書
判度支杜公琮始憲宗時宰相權德輿有壻獨孤郁爲翰林學士
帝愛其材因命宰相曰我嫡女旣笄可嫁德輿得壻獨孤我豈不
得邪可求其比後丞相吉甫進言曰前所奉詔臣謹搜其人因名
我烈祖司徒岐公曰有孫兒琮年始弱冠德行文學秀朗嚴整臣
嘗爲司徒吏熟其家事官族世婚習尙守治臣一皆忖度疑琮可
以奉詔帝卽召尙書見與語大悅授殿中少監服章金紫以元和
八年某月日主下嫁于杜氏上御正殿禮畢由西朝堂出節幡鼓
鐸儀物畢備引就昌化里賜第上御延喜樓駐止主輪尙書及賓
侍酒食金帛奏內樂降嬪御送行賜第堂有四廡績椽藻廬丹白
其壁派龍首水爲沼主外族因請願以尙父汾陽王大通里亭沼
爲主別館當其時隆貴顯榮莫與爲比主實憲宗皇帝嫡女穆宗
皇帝母妹敬宗皇帝今天子親姑尙父汾陽王子儀外曾孫太皇
太后始以正妃事憲宗以太后太皇太后愛養三朝凡四十年德

厚慈恕化充六官主以一女之愛降于杜氏逮事舅姑杜氏大族
其他宜爲婦禮者不翅數十人主卑委怡順奉上撫下終日惕惕
屏息拜起一同家人禮度二十餘年人未嘗以絲髮閉指爲貴驕
始與尙書合謀曰上所賜婢奴卒不肯窮屈奏請納之上嘉歎許
可因錫其直悉自市寒賤可制指者自是閉門落然不聞人聲尙
書讀書考今古治亂主職婦事承奉夫族時歲獻饋吉凶賻助必
親自經手池寒館陔闢球場種樹不數年搢紳閒雜然稱尙書有
賢婦尙書旋出爲澧州刺史主後尙書行郡縣聞主且至殺牛羊
大爲數百人供具主至從不二十人六七婢乘驢聞茸約所至不
得肉食驛吏立門外舁飯食以返不數日聞于京師眾譁說以
爲異事尙書在澧州三年主始入後出中閒不識刺史廳屏尙書
治澧州考治行爲天下第一後爲大司徒京兆尹鳳翔節度使朝
廷屈指比數以爲凡有中外重難非尙書不可主賢益彰雖至宮
闈貴號亦加尊敬姑涼國太夫人寢疾比喪及葬主奉養蚤夜不

解帶親自嘗藥粥飯不經心手一不以進旣而哭泣哀號感動他
人尙書後爲忠武軍節度使所治許州創爲節度府五十年南迫
於蔡屋室卑庠主居無正堂處東支屋恬然六年許軍強雄且撐
劇寇自始多用武臣治各出己部曲家人疵政弛法習爲循常有
司用比邊障遠地擲置不問民亦甘心尙書再治之老民相率兩
走闕下遮丞相馬叩頭乞留請樹生祠及詔追去攀緣攜扶哭於
道路尙書治外主治內尙書所至必稱崩削爲名公偉人主實有
內助焉穆宗以太皇太后敬主尤爲親信俯首益卑車服侍使愈
自貶抑覲謁溫清外口不言他事訖穆宗朝人不以親貴稱當貞
元時德宗行姑息之政王武俊王士真張孝忠子聯爲國壻憲宗
初寵于頔來朝以其子配以長女皆挾恩佩勢聚少俠狗馬爲事
日截馳道縱擊平人豪取民物官不敢問戚里相尙不以爲窮弱
自主降于尙書壁絕外之初怒中笑後皆敬畏累聖亦指示主德
以誠警之至于今以主尙書顯重於中外戚里亦皆自檢斂隨短

長爲善於是舊俗滅不復有尙書自許奉急追詔主有疾小愈強不肯留曰去朝興慶宮縱死於道吾無恨以開成二年十一月某日薨於汝州長橋驛享年若干上廢朝三日其年十二月某日主喪至京師比及葬兩宮弔問相繼於道開成三年某月日上御正殿詔丞相嗣復攝中書令正衙宣冊謚曰莊淑大長公主某年某月日耐葬于萬年縣洪原鄉少陵原尙書先塋禮也生男二人長曰輔九年十歲次曰楊十始二歲女二人某於尙書爲從父弟得以實銘銘曰

章武皇帝唐中興主刑于正妃教及嫡女婉婉帝子下嫁時賢影逐響答隨順纏綿杜氏大族枝蔓蟬聯上有舅姑高堂儼然螭綬龜章玉佩金軒養色悅意侍後承前人不我貴我敬我虔始終盡禮大小周旋餘二十年誰興閒言貴不召驕富不期侈是此四者倏相首尾自古名士或泥於此孰謂帝子超脫擺棄婦職是勤夫言是指池荒館侈屏外不履淑德柔風天下傾耳宜乎壽考歸女

婚子不錫全祉孰提神紀幽石有誌顯筆有史流于千祀

唐東光縣主神道碑銘

并序

李華

先朝宗室之望曰紀王太宗第十子也惟帝族母師曰東光縣主紀王第三女也自天降祐生有令德年八歲王不豫循環左右不食累日王撫首諭焉爲之進膳縣主察起居未復憂色如初動於神祇王疾用閒周文樂正之養不過焉至若天人之秀元氣之純積於中文於外其容可知也孝以奉親慈以臨下尊師傳服澣濯其德可知也禮傳爲簪珥詩書爲佩玉原心而顧身體訓而成教其言可知也降尊而處下推泰而從約詣繡繪之妙適飲膳之和其功可知也年十八受封邑王擇聞喜公以妻之聞喜有王佐之材委會蕃邸縣主以皇孫之貴和鳴侯家陰德莫違輝動邦教養先姑如窻膝下奉君子如見大賓以徽柔睦娣姒以莊敬端幼賤鵲巢之化存焉太后臨朝諸武專政魯衛之國翦焉邱墟紀王流竄巴濮薨於道路縣主承訊崩心嘔血每一發聲飛鳥哀鳴草木

無色外除之後衣裳無純采杯圈無甘食耳不聽聲首不加飾自
朝廷達於寓內罔不哀之太后復辟中宗出震日昇暘谷天下文
明雷破羣陰品物咸遂以王懿親盛德詔有司備禮物陪葬昭陵
聞喜公時爲孝義令詔書至河縣主聞之嘔血而絕而復蘇告
諸子曰家國再造冤酷獲申爲我謝中外親親下見先王瞑目無
恨言未畢而薨春秋五十有四時神龍元年二月二十二日有司
以聞中宗震悼召聞喜公問公悉以對上獻歛久之殿省垂泣六
宮悽愴乃下詔褒美史官撰德弔祭贈禮過其備矣深於春秋
者歎曰孝之至不忘其親忠之至乃心王室自古賢士大夫莫能
備舉惟縣主有焉紀王之陷非罪也泣血以終哀中宗之撫輿運
也則感深而殞絕忠孝兩極首其人倫使百代之下聞其風者有
以勸焉其爲不匱遠矣嗚呼天輔善人宜其有後男十人女十人
四子至大夫曰邁曰邁曰邁邁仁則踐修孝惟明發少子德位兼
盛曰迥今河南尹兼東都留守上柱國祿益厚而慕益深不逮劬

勞之報故也銜涕投簡而命下吏敬銘三章式表幽宅其文曰
肅雍王門天帝之孫因心則孝懷盛敬尊配美良士如賓禮存泣
血終身豈惟霜露慶集家國魂清冢墓壽絕哀歡事高緇素天作
邱山萬化攸歸地閉金印泉深袞衣國風悽愴彤管無輝

文粹卷第五十五下

文粹卷五十六

吳興 姚鉉 纂

碑八 總四首

宰輔

唐故中書令梁國公姚文貞公神道碑銘 張說

唐故丞相尚書左僕射贈太尉太原王公神道碑銘 李宗閔

唐丞相太子少師贈太尉牛公神道碑銘 李珣

齊成公神道碑銘 權德輿

唐故中書令梁國公姚文貞公神道碑銘 并序

張說

敘曰八柱承天高明之位定四時成歲亭育之功存畫為九州禹也堯享鴻名播時百穀棄也舜稱至德由此言之知人則哲非賢罔又致君堯舜何代無人有唐元宰曰梁文貞公者位為帝之四輔才為國之六翮言為代之軌物行為人之師表蓋維嶽降神應

時閒出者也公諱崇字元之姚姓有虞之後遠自吳興近徙于陝
今家洛陽焉烈考長沙文獻公樹勳王室建旗鶴府公紈綺而孤
克廣前業激昂成學榮問日流武庫則矛戟森然文房則禮樂盡
在弱冠補孝敬挽郎又制舉高第歷佐濮鄭並有聲華入爲司刑
丞天授之際獄吏峻密公持法無頗全活者眾進夏官員外郎郎
中侍郎朝廷曰能遂掌軍國遷鳳閣侍郎兼修國史兼相王府長
史始則天人讓王承置醴之願終以飛龍利見延參乘之恩自時
厥後恆當大任凡三處兵部尙書三入中書令一爲禮部尙書左
庶子又肅政大夫總靈武軍兵馬使又司僕卿知隴右監牧出典
毫宋常越許申徐潞揚同十郡景雲初以藩邸舊僚封梁國公食
賦百室公性仁恕行簡易虛懷汎愛而涇渭不雜真率徑盡而應
變無窮常推是心以御於物故所蒞必毗庶風偃驚很化從言不
勵而教成政不威而事理去思覩頌來暮聞歌旣登邦政卒乘輯
睦及在宗伯神人允諧今之中書是爲理本謀事兼於百揆論道

總於三台公執國之鈞金玉王度大渾順序休徵來臻懋德格天
名遂身遜拜開府儀同三司崇其秩逸其志也初太夫人在堂公
受職西掖頗限局禁求侍晨昏優詔旣許尋令還職公固請以泣
制曰家有令弟足慰母心國有棟臣安可慙闕其後剖符江表敦
諭起復衰麻外墨欒棘內毀變禮中權通識所貴神龍之首預聞
興復疇其并賦累讓而停夫以革故鼎新大來小往得喪而不形
於色進退而不失其正者鮮矣君子曰忠不忘親仁也哀不違事
義也讓功辭邑禮也濟代全名智也仁以長人義以和下禮以安
上智以周身宜其光輔四帝軒冕三紀池臺琴筑優游暮齒傳爵
土於祚胤保祿位於終始矣享年七十有一開元九年九月寢疾
薨于東都慈惠里皇上悼焉國人慕焉撫牀輟春曾未云比制贈
揚州大都督諡曰文貞禮也十年二月葬於萬安山之南原在疾
也王人賜膳御醫視藥于薨也中使弔臨羽儀哀送君臣之義厚
莫重焉子异子弈思綴遺美以寘罔極有詔掌文之官敘事盛德

文粹卷之五十六
天太
之老銘功將以寵宗臣揚英烈帝乃灑恩仙翰鏤澤豐珉日月臨
照於佳城煙雲變態於神道寶其文字別爲羣玉之山禁其樵蘇
即表三司之墓銘曰

源深自虞派別從吳避地魯陝居家洛都神明遠契嶽瀆冥符翊
聖斯偶生賢不孤仁將勇濟孝與忠俱學刃攢植文鋒迅驅纜安
卑位卽騁長途惟實惟有若虛若無再三軍國一二訐謨戎柄尤
重王綸最樞兼司任切久政榮殊黼藻彌煥丹青靡渝以寬容物
以鑒分區外或形放中恆禮拘箴雖誠口諍亦忘軀但覩渾璞誰
詳瑾瑜伊皋尺寸管樂錙銖名正身遂言誠願孚方辭漢祿更辱
齊租既積而散窮歡盡娛川歸東極日去西晡上惻旒展旁悲路
衢藍田美玉荔浦明珠載廣休慶爰弘典謨豐碑迺立盛業其鋪
帝念頻軫仙豪特紆鐫金刻石鳳篆龍圖七耀光動三泉澤濡銓
欽一作能叙事理鬱詞敷求舊銘實慙殫恧蕪緬思雲霧尙想江湖
有道之德其何以踰延陵之墓空此嗚呼存歿終始遐哉邈乎

唐故丞相尙書左僕射贈太尉太原王公神道碑銘并序

李宗閔

上卽位五年正月丞相左僕射太原王公以癸未發疾其明日遂
薨於位天子震悼愍遽命內謁者詣其室索其所以飲食寢作
之端既詳其無他狀遂賻布帛菽粟率用峻等旣又不塞痛軫之
意加內府之絹千匹以錫之爲之罷朝三日命兵部侍郎一人持
節駕駟簫鼓出自正殿直抵柩前冊公爲太尉葬有日官給祕器
及就途遣王人亟臨視之命羽葆旂常輅車之飾皆及墓俟其返
虞鼓聲四節於里第而還示不與常制等也其子鎮以宗閔晚陪
公於相位之末稍窺公之行請銘其烈以垂于後且不宜拒遂鋪
其犖犖所能言者於金石云公諱播字明敷太原人周靈王太子
晉之後以歷世爲王因而受氏高祖滿汾洲長史生大父璡嘉州
司馬給事中司馬生昇咸陽縣令太子少師少師生恕揚州倉曹
參軍尙書左僕射公僕射元子也忠敬而本仁寬明而有制內顯

而敏外肅而和貞元十年舉進士第是歲策賢良以直言校書於
集賢殿其言平戎經國之術粲然可舉調尉墊屋斷獄首出御史
中丞李汝愛之奏爲監察御史按雲陽丞源咸季以贓免用疑文
不宜調而調因謁於臺遂捕劾之追姦胥窮律旨奏流咸季刑曹
郎罷所居官給事中以省詔非是奪俸緣而坐罪者甚眾自是風
聲不可遏矣爲侍御史時京兆尹李實文皇寵委能禍福卿士凡
其榮衰繫所附背舉朝迎避其鋒公在途而實來揖公移文詆之
其詞可羞實遂奏公爲三原令求其不足於禮以持之公至尹署
泊羣吏之館還其邑敬府之禮無不具實既出其算反加畏焉縣
之編於戶者多中貴人前令率不能自爲其政弛張牽之公悉召
所謂貴人者入坐當其堂一作平拜曰敬桑梓宜如是也邑人大駭從
其所指爲長安令朝廷方恩于頓而以帝女嫁其子民有與于氏
蒼頭同盜人馬者前令捕民而縱其蒼頭公始至縣卽立取其奴
而與民均其法知御史雜事京師饑穀起價京西諸侯相率閉粟

公移之簡書徵秦晉汎舟之說西鎮惴惴收去條合粟流于秦元
和四年爲御史中丞歲中知京兆尹六年爲刑部侍郎充鹽鐵轉
運使上言流人會赦而歸獨配囚爲隔遂無還者請率以七歲爲
竟至今用之尋加禮部尙書益以御史大夫又以戶部尙書節度
西蜀長慶初覲穆宗言中外之事遂留爲刑部尙書復幹鹽鐵冬
拜中書侍郎平章事仍其職匡維激發始以進賢爲急上方有意
河朔以財賦始出於方土二年公用相印爲淮南節度使以其職
隨之四年言事者謂鹽運之設宜留京師用制方土加檢校司空
去其使未幾上念公成法又以使屬公加司徒今上踐祚急詔徵
公至卽拜左僕射同中書門下平章事仍其使尋兼太清宮使累
進爵至太原郡開國公食邑二千戶進階至金紫光祿大夫年七
十二而薨公入官三十二政逮事六帝出統楚蜀之師入極台宰
之尊前後三總鹽鐵既去又復幾二十年天之所覆地之所載寧
有獨私於公邪必有以當其然也一署吏苟不犯無能奪其任者

歲時奏課至于策太史胥次遷亦如之故人用安其爲善莫有欺
公者雖遠至海裔若總轡管榷窮年不死一吏貶一職而羣務自
濟凡朝廷平淮取鄆屠汴下滄景干戈不息者五六十餘年饋餉資
費隨其緩急而立辨沛然若神給其閒溝琵琶導潁河以漕輕舟
師人坐受其飽疏三門挽沈石以濟巨艦關中遂忘其饑薦皇甫
鏞之強敏而鏞反短公於上公猶不知上謂其長者論景忠信矯
制逗撓之將期必抵於罪時服其敢爲深涉徐境導齟齬而爲忠
概人曰真宰相器也權征之外有雜緡率貢內帑號爲羨進貞元
中歲不過十二萬緡及公歲貢百萬緡凡國有大征伐不慮其費
之有無洎丞相晉公專征討之事兵食之給悉出於公公方從容
以贊其成及滄景平公有叶力之助自御史中丞京兆尹總賦秉
政未嘗書笏爲記善於啟奏天子不能自守其喜怒公以專志持
務密匡於上行已寡徒不喜伐露由是數帝任遇多被恩澤權利
去留如在諸己人多意公能詭合於時及公再持相印與晉國洎

文粹卷五十六

四

五

六

一二公同輔於上趨嚮甚直雅符於道苟所舉公是公必扶之卽
非是公遂嘿嘿不和由是上知公重厚而同列亦聳待之乃見公
之所爲與嚮之不知者期公蓋甚戾也公旣屈於名而伸於富貴
豈非盛德君子神明之所佑邪故夫人清河崔氏給事中銳之女
嗣子式祕書丞砥服名教不以丞相子自居其身次曰冰始授京
兆府參軍事器度宏遠公之仲弟曰炎季曰起與公三人俱用文
學奮於江左西遊長安七中甲乙時議偉之公歿不幾日而起以
戶部尙書司國之計門闈之士咸來哭賀羣吏之執籍繁夥一如
公之時其亦於世難求也其從事故相國程公昇今荊州相國段
公文昌其他分居中外羅諸臺閣者不啻三十人銘曰
歲在大和惟帝聖神圖任舊臣乃相太原惟是太原福祥一作其
奔再持化權樞揆聯聯兩統劇藩楚淮蜀坤始自元和公秉貨泉
憲穆敬文洎茲聖君四帝財征去公孰親惟煮惟鑄惟範惟聚東
掃北殄上之所怒帶甲百萬餼食爲巨俾公尸之不勞而具變通

文粹卷五十六

五

以時物無阻滯綱條一施莫越其規遇眾以仁中控其機信行恩
馳罔有詐欺公之維揚漕務其將公之留庭職與公并首尾貫聯
幾二十年相符使符隨其興祖公之敏智顯爵自至不紛其外姑
直其裏始承其風畏公之邃及與之同泳公之易仁人之迹歿而
乃熾揭於茲碑不仆不倚

唐丞相太子少師贈太尉牛公神道碑銘并序

李珣

天球河圖有國之大寶麒麟鳳凰王者之嘉瑞方於賢彥卽又次
焉天祐我唐才傑閒出輔時興化代有其人公諱僧孺字思黯隴
西狄道人本子姓漢有牛崇爲隴西主簿因家焉代爲西州豪族
入代祖弘仕隋爲吏部尙書封奇章公佐佑文帝有重名於時高
祖鳳中宗時爲春官侍郎掌國史曾祖休克集州刺史贈給事中
祖父紹太常博士贈太尉父幼聞華州鄭縣尉贈太保公七歲而
孤依倚外族周氏嶽嶽卓卓有老成之風以喪禮自處未嘗戲弄

年十五知先奇章公城南有隋室賜田數頃書千卷乃辭親肄習
孜孜矻矻不捨蚤夜洎四五年業成舉進士軒然有聲時韋崖州
作相網羅賢雋知公名願與交公袖文往謁一見如舊由是公卿
藉甚名動京師得上第聯以賢良方正舉又冠甲科策中盛言時
事無有隱避持權者深忌之出爲伊闕尉名府賢侯羔鴈繼至封
章屢薦每爲中執事所沮皆不滿秩從潞帥郝士美簡授管記三
奏不得請竟除河南尉會有次對大僚因言事解於上前遷監察
御史丁太夫人憂服闋除本官轉殿中公以文高氣直累歲堙屈
問望所屬推美於臺閣閒入省拜禮部員外郎時孟尙書簡有重
望以地官貳卿兼領綱憲薦公知雜轉都官員外兼侍御史免憲
職授考功員外郎集賢學士穆宗卽位宰相稱其能遷庫部郎中
掌書命召對與語上德之面賜五品服未幾遷中丞每對延英必
移時盡言天下事有武將李直臣爲宿州刺史豪奪聚斂以貨數
百萬厚結權貴公按之爲有力者排幾不勝竟以詞堅理直上意

迴直臣乃得罪由是上以清直知又面賜金紫拜戶部侍郎時望
允塞中書令韓弘以財投分公拒而不受上因他事知之愈賢公
遂作相持重顧大體不言細事嘗謂同列諸相曰致理之本流品
爲先彝倫攸敘蓋謂此也每惜名器力與同列爭方鎮以不廉聞
者輒奏貶以賄賂求進者必阻之先是李司徒逢吉與杜循州元
穎同作相穆宗寢疾議建儲貳與公不協後元穎出鎮井絡逢吉
銜之思有釋憾於政事堂謂公曰西川前有廢立謀上熟知之來
日延英發其事公不知慎勿沮議公曰王導有言吾雖不殺伯仁
伯仁由我而死正近此耳又安得不言哉逢吉喑鳴而止敬宗年
少嗣位公雅善敷奏每言一事必本末陳之上甚倚愛同列挾中
助力赫赫嫉公之賢公亦思避其鋒三上疏求外任上以武昌善
地建節幢兼相印以授之既至問人所病害咸言鄂土疏薄歲一
修城役工誅茅人用咨怨公默許心計埏泥範塶未及三年盡換
舊制崇墉堅壁人到于今賴之文宗嗣位二年公入覲詔復相位

文粹五十六

六十一

友三

上雅知公名一見恨得之晚會宋相申錫以廉介聞巨姦鄭注挾
北軍勢卜射取財貨富侔於國忌宋之直陰畫詭計誣與藩邸通
因內臣而上其變造作似是眾皆符會上驚聞激怒下法吏議其
罪諫官伏閣爭不得公入侍密啟上意乃寬止於郡佐公實有力
今李崖州鎮劍南西川上言西蕃別屯以維州降帶甲之士甚銳
其地要害得之足以壯邊部徐圖河湟此其漸也上疑不決下南
官議百執事皆是西川奏公獨曰國家近與昆夷歃血四鎮晏然
今若自虧大信大戎恃眾見詰渝盟彼直我曲未可量也上曰丞
相之言是詔還維州初德裕承藉地勢自負機術公介特素不與
之交及是大不平遂成宿憾公與李尚書宗閔同輔政出入殿省
進退有度上偏目公曰卿才類霍光異日可屬大事公懼滿辭位
再陳封章寵加端寮出鎮淮海不改相印再登將壇揚州當江淮
之衝習偷薄之俗公以清淨簡易化人移風俾及五年臻于至理
倉廩實禮義行刑措成脫屣歸洛優詔屢降雅志不回拜檢校

文粹五十六

七

司空東都留守文宗將有大制置大除授必降中使假於他方入
皇城宣密旨獻可替否如在君前其信重也如此俄以左僕射徵
王人就賜官告特明異禮公感恩雖厚退身愈堅一對而歸不詣
相第亦有中阻未諧人情又加相印出爲漢南節度使制出上悔
之欲追成命公固辭上曰且不與卿周歲別出都門特賜清廟器
六事皆範金飾玉如古時製宣曰以卿精忠用以貺別寵待之禮
當時無儔公到襄州均井稅薄地征人用胥悅咸歌來暮武宗初
纘極聽信未一行險者乘時而起凶德參會倒置天下事清賢名
輩多被斥逐惟公位高德重最難搖撼跪跪齟齬幾至二年屬大
水壞居人廬舍公以實上聞仇家得以逞志舉兩漢故事坐災異
冊免降授太子少師時議不平又還檢校司徒兼太子太保俄又
改太傅再臨東郊劉從諫死劉稹自擅以昭義軍阻命天兵誅討
五年方尅上喜甚素忌公者媒孽鍛鍊誣公與從諫交上怒下詔
旬日三貶公至循州長史鑿空指鹿四海之士咸冤之公推運達

命恬然如得好官時踰嶺越險二年在海上無所苦今上卽位大
明善惡三遷至少保轉少師牽復高位分司東洛池臺琴酒逍遙
自娛賢士大夫尙其軌躅未半歲遘疾薨於東都城南之別墅自
嬰疾至于捐館談笑語言宴居自若口占理命纖悉無遺上聞爲
之軫悼聯日不視政公卿相弔正人雪涕冊贈太尉遣大寮弔祭
公端明簡重忠厚誠慤平居私室如對大賓不喜釋老唯宗儒教
早與韓吏部皇甫郎中爲文章友其名相上下晚與白少傅劉尙
書爲詩酒侶其韻無高卑前後作鎮皆佩相印辟署多人難於
進而勇於退儉必中禮貴而不奢知命達理保和居易三領大鎮
接護軍以禮貌不至交歡再入中書待樞使以公平不容請託有
恩必報有讎不校韋崖州於公恩也嫁二女歸名士薦長子登周
行李崖州於公讎也卹竄謫之窮途厚供待於逆旅其厚德歟亦
難能也夫人同郡辛氏贈僕射祕之女賢明懿淑稱於族姻有子
五人曰蔚曰叢能嗣其業皆擢進士第蔚監察御史叢使府協律

日奉倩洛陽尉二人未知名公以大中戊辰歲十月二十九日薨
以大中己巳歲五月十九日葬小子不佞早栖門牆考選第叨殊
等之科開賓筵忝入幕之吏國士相遇筆札見知周旋款眷垂三
十載刊石表德分也難辭公歷官三十一政作相一十九年逮事
六宗光輔四帝承主恩必由直道解相印實無罪名自少及長不
失色於人佐時理家無悖入之貨持身不撓履道甚夷嘗病在高
位者不知止足終日抗論剋期拜章竟不及年俾孤美志銘曰
公之生兮稟星辰之道兮侔古人公之才兮渾而真公之性兮
威且仁公之文兮班馬鄰公之藝兮游夏均公之儉兮自我身公
之簡兮無雜賓公之貞兮肅人倫公之慎兮質鬼神公為相兮平
如鈞公為邦兮政如春公不幸兮罹數屯公無辜兮介于循天開
日明兮堯舜為君舉直指枉兮幽冤必伸牽復高資兮言旋洛濱
逍遙琴筑兮無異隱淪屈指懸車兮歡然十旬素懷未遂兮美疢
來臻悲纏冕旒兮哀動搢紳寵贈加等兮冠于台臣有司職喪兮

歸葬咸秦觀者歎息兮國人酸辛哀慶餘兮令嗣旒旒陳寔道
廣兮門生振振乃續徽猷兮刻于貞珉碑生金字兮名德長新

齊成公神道碑銘

并序

權德輿

有唐文學政事之君子曰相國齊成公諱抗字遐舉清方粹溫絜
矩秉彝明誠盡性切劑化育之道精義入神旁魄天人之際以忠
事君以病乞身乃去台宰乃儕商皓然後撤琴瑟啟手足歿齒無
違德以從先大夫於九原易名曰成不亦宜乎公定州義豐人自
太公表東海桓公匡天下為國為家或哲或仁烈祖贈太師府君
諱澣歷給事中中書舍人吏部侍郎止於平陽太守出入陟降中
行山立至今言開元名臣者稱公有遺直遺愛焉實生先公贈國
子祭酒府君諱翱履道貞厲仕至左龍武軍倉曹積厚於上流光
於下其位不充故大受於成公公既薨而孤哀過成人屬幽陵橫
潰中夏如燬奉太夫人安輿違難於越得子州支伯之故地而偕
隱焉誅草茅以順居息悅山水以資仁智方茂天爵用觀靈龜嘉

招重問奔走以狎至虛己弘道從容而翔集吳郡張相君鑑方以
仁義理濠上得君為榮及進律于洪成師于岐累為命介若驂有
靳建中中戎王謀大和會以休寧西方右扶風縣亘汗隴地當甌
脫且有成命正其經界公實佐中權登壇泣盟得其情數與之約
結克就衣裳之會用銷邊鄙之警自解巾三遷至殿中侍御史俄
屬涇旅竊發羣兇肆毒天兵展義於甸內王公死難於理所百舍
奔問至于行官拜侍御史有詔以蕭黃門復布凱澤於東夏命公
為工部員外郎以贊焉復命轉倉部郎中李懷光阻命于蒲連兵
未解關中饑旱經費不足轉粟饋軍濟時之艱患求才急病命使
以專達遷兵部郎中兼御史中丞以董其任俄拜諫議大夫當軸
者不相容坐婚親細故出為處州刺史先是山越寇攘蕩覆城市
公乃卜勢勝之爽塏因習俗之便安三時不害百堵皆作朝典陟
明拜蘇州刺史吳實劇部大田多稼浮淫冒沒吏禁或弛占著名
數戶版不均公乃閱其生齒書其比要強家大猾不得葢藏公特

單騎與之紆息已日乃孚厥猷茂焉遷潭州刺史御史中丞湖南
觀察使以嚮時二郡之理而弘大之其仁可知也左曹理本徵為
給事中周郊寄重擢為河南尹盜有宋瞿曇者白晝椎剽為羣偷
囊橐三川病之幾三十年公法令嚴具網羅張設名捕魁宿使無
遺類指顧之間擒擿如神乃作祕書章明文雅修舊以起廢乃作
太常統和神人節事以辯志便蕃大僚其道乃光德宗皇帝方以
堯舜氏聰明之道馭天下用賢人充相位拜中書侍郎同中書門
下平章事熙九功之歌質百官之成損益文憲化裁形器精微以
折中密靜而不伐或事隱於造膝或言行於沃心初天官氏每歲
表他曹郎二人閱多士試言第其甲乙春官氏俾考功郎中選孝
秀之親故者而進退之公以冢宰小宗伯為官人取士之本蓋天
子有司之重寄至於避小嫌亂舊章適滋旁歧孰謂局鑄蹇蹇坦
坦之道豈如是邪然後闢康莊作衡尺遵公是之路去自便之私
天下之人謂之理道尋有詔修國史昔孔父無位以空文為一王

法公當盛明之代用宰司總直筆其於褒貶勸懼明焉勤慮盡瘁積成寢恙累章乞告改太子賓客遭罹不淑贈戶部尚書時貞元甲申歲夏四月春秋六十有五夫人河南獨孤氏某官某之女賢明早天繼夫人蘭陵蕭氏某官某之女仁順有禮法嗣子餗銜恤毀瘠侍公裳帷以某月日耐于東都某原喪祭哀敬君子以為有後惟公深而通肅而寬出處動靜必以中正敬用五事暢於四支資性儼恪尤長鑒裁在岐也薦齊忠公映佐蕭也薦盧恭公邁皆至宰相其他推轂薦士為漢廷臣成天下重名碩望者不可勝書凡所論著皆研幾析理弘雅夷遠洪州文宣王廟碑張蕭盧三相國碑誌本聖人教化之蹟推大政著明之道固其性術講貫而法舒乎斯文文集二十卷中倫體要盡在是矣公薨五年餗調為洛陽尉永惟先烈未刻豐碑以德輿夙承湖海之舊中忝掖垣之屬他日舉代靡形話言獲於遺編實見陰德顧茲無似有玷知人濡涕含豪以表幽宅銘曰

昔在營邱大風泱泱有倬平陽令聲章章不踐宰政慶貽子姓倉曹含光大學追命厥生中書秉哲居正鵬起扶搖鸞翔慶霄乃登紫微以瑞清朝吉凶糾纏寒暑結轡其生有涯其用未極壽堂冥冥宰樹森植揭茲馨香終古是式

文粹卷弟五十六

文粹卷五十七

吳興 姚鉉 饗

碑九 總七首

使相

唐太尉中書令西平王李公神道碑銘

裴度

唐故朔方河中晉絳邠寧慶等州兵馬副元帥河中絳邠

節度度支營田觀察處置等使元從奉天定難功臣開

府儀同三司檢校司徒兼中書令河南尹上柱國咸寧

郡王贈太師忠武渾公神道碑銘

權德輿

唐司徒兼侍中中書令許國公贈太尉韓公神道碑銘

韓愈

節制

唐故四鎮北庭行營節度使扶風郡王贈司徒馬公神道

碑銘

常袞

唐贈司空范陽大都督忠烈公李公神道碑銘

楊炎

隴右節度大使涼州都督郭公神道碑銘

張說

唐故邠寧慶等州節度觀察處置使朝散大夫檢校戶部

尚書兼御史大夫賜紫金魚袋贈右僕射史公神道碑

銘劉禹錫

唐太尉中書令西平王李公神道碑銘

并序

裴度

惟天錫成命於我唐保茲國祚生此人傑則西平王李公其是乎不然何覆暴如風振槁葉戴君若鼉冠靈山橫流之中一匡而定公諱晟字良器其先隴西人也後徙京兆曾祖嵩皇珉州刺史贈洮州刺史祖思恭皇洮州刺史贈幽州大都督考欽皇左金吾衛大將軍隴右節度經略副使贈太子太保代有名跡雄於西土公幼好學學不爲己及讀呂張孫吳之書慨然有經邦濟物之志未弱冠遊秦涼閒元侯宿將見者咸器異之乾元初嘗客武都值酋豪以缺守邁亂殺掠平人公與所從十數騎馳而射之殪其爲魁

者餘黨遂遁寇所虜獲積如邱山公一無所取惟椎牛醢酒享士而去邦人感服具以狀聞特拜左清道率飾以金紫將朝京師自獻方略屬裔夷紛擾有土急賢河隴將帥相繼表用歷二府右職所至常以才謀爲其委重累遷至光祿太常卿階爵在第一品涇原四鎮北庭節度都知兵馬使四面都游奕使懸識虜態周知地形應變不窮有奪有待驥驟庭而莫展雲出岫而斯飛代宗徵之以左金吾衛將軍爲神策軍兵馬使屬羌蠻犯蜀朝廷濟師命公督禁旅絕棧道而往救焉公銜枚過險出賊不意連下堅壁遂誅首惡還授檢校太子賓客且復舊職建中二年田悅以魏叛德宗極意致討悉起徂征以公爲神策先鋒都知兵馬使加御史中丞與河東河南等道諸軍合擊公濟河而行能以眾整及破洹水陣解臨洺圍轢魏屬城抵燕趙邑其摧鋒劔銳皆先羣帥而實力焉遙拜左散騎常侍兼御史大夫厥功未成聞賊泚肆逆皇居失守西嚮慟哭載馳驅行及代北授檢校工部尚書充神策行營節

度公提孤軍募散卒拊循訓勵以達行在值懷光中叛大駕再遷
加檢校右僕射餘如故尋轉左僕射同平章事兼京兆尹神策軍
京畿鄜坊節度觀察等使管內及商華等州副元帥公固守渭城
決平秦壘調食用先發我私捐甘攻苦皆自我始每一言一誓
聲淚俱發勇夫義士感而使之蔑不濟矣時自雍而東延于汝洛
震於河汴所在征鎮亂掠相從公介巨盜之間使聲援斷絕立成
師之法致號令嚴肅蒐捕十旬指揮一舉乘墉壑而通軌道磔梟
獍以清宮禁俾九市三條無輟肆之驚無秋豪之犯羽書速告鑾
輅爰歸廓氛禋爲祥光攄憂憤爲喜氣詩曰允矣君子展也大成
斯之謂歟考古視今論功稱忠者多矣若至危而安至難而易卓
犖跨邁如公莫儔拜司徒兼中書令俄以凶孽甫寧邊防猶警岐
下任重乃以本官兼鳳翔尹鳳翔隴右節度觀察等使及四鎮北
庭涇原等州副元帥改封西平郡王加食邑實封至一千五百戶
公名懾戎王政和藩部始至而生植少安而訓齊逮四載賦輿十

倍其初會課入輔拜太尉中樞如故人或謂公勳望已高寵渥已
極宜從容頤養稍稍遜避公曰不然人臣外則盡力內則盡心若
止偷榮孰爲且哲故每承帷幄之問則言拂無隱理奪不回大指
以東夏可平西陲可復或已行而事終不顯或未用而身遽不遺
以貞元九年八月四日薨于位春秋六十七德宗撫几哭於別次
自都邑達關畿無士庶無老幼皆發哀相弔則曩時安人戢兵之
德可謂浹於元元之骨髓矣冊贈太師賻贈加等以其年十二月
十六日葬于高陵縣奉正原鄭國夫人杜氏祔焉自捐寢至安宅
皆所司辦護中貴反覆萬情所奉如不及焉嗚呼以公之靜難扶
傾不言所利雖存歿極位始終殊禮而天意若曰其福享未至故
迤延於後有子曰愿故檢校司空河中節度等使贈司徒五列雄
鎮三爲上公曰聰故光祿寺主簿曰總故太子中允贈兵部郎中
曰憇左神武軍大將軍兼御史大夫曰憑故右威衛大將軍兼御
史中丞贈洪州都督曰恕故光祿卿贈右散騎常侍曰憲檢校左

散騎常侍嶺南節度觀察等使兼御史大夫進因貴胄達以善政
曰愨故檢校左僕射同中書門下平章事贈太尉克廣前修仍執
醜虜曰懿故渭南尉曰聽檢校司徒義成軍節度觀察等使統戎
按俗是以似之曰慧右羽林將軍曰愨嵐州刺史並地勢吏用兼
而有焉粵大和元年秋七月聽拜疏上言以公之徽烈則御製碑
文於渭川矣公之風度則詔命圖形於雲臺矣唯大其邱隴鬱彼
松檟望有祁山之象拜無峴首之碑將刊貞石式表幽隧乃命臣
度稱伐言詩其詞曰

建中季年大盜忽焉皇輿避狄狩於梁川顧謂太師汝才汝略將
威致討必殄寇虐太師泣奉捐軀誓眾度其成城可以利用赫矣
鋪敦傅於牆垣手搏足踏如衝如援一鼓而破一麾而奔掃清宮
闈刷盪妖昏我師莅止我令行矣都人不知己事方喜飛章告慶
飭駕言旋鴻烈耀古謹聲動天車服之錫河山之誓九命而俯一
心若厲俾侯於岐阜安邊陲藩政既成袞職攸宜嶽降帝賚矢言

詭詞我后嘉猷我躬何爲道直氣和勞謙終吉福履所綏未享萬
一上天不惠厚宥遄歸垂裕流光用延恩暉翼子肥家將壇台席
繼立奇功代傳休績聽與伯仲永懷高蹤請于朝廷表是邱封帝
曰孝哉胡可不從宣我祖之丕業繁爾父之嘉庸乃詔作銘以觀
億齡

唐故朔方河中晉絳邠寧慶等州兵馬副元帥河中絳

邠節度度支營田觀察處置等使元從奉天定難功

臣開府儀同三司檢校司徒兼中書令河中尹上柱

國咸寧郡王贈太師忠武渾公神道碑銘

并序
權德輿

天地訢合以生萬嘉其成歲功也則有震耀肅殺之助焉君臣保
父以熙百志其講武功也則有經綸翼戴之輔焉龍蛇起蟄山澤
通氣與運相值有開必先斯太師所以宣力四代稽謨七德輝耀
威靈勤身濯行霆擊風行乃緝熙于光明故瑀戈淑旂以嚴師律

黃旒玄袞以正台曜湛露彤弓以覺報宴納書追命以榮恤禮蕃錫始終如公之功公諱城字某其先夏姒之後爲涪維漢劉之代爲渾邪或強爲與國或分以保姓貞觀中開置州壤就加官師曾祖元慶皇豹韜衛將軍靈邱縣開國伯祖文壽皇太子僕贈尙書左僕射考釋之皇開府儀同三司太常卿兼御史中丞靈朔郡王贈司空惟靈邱紹先公之職居次卿之重僕射以積厚克家靈朔以偉才雄邊貴仕崇勳乃列茅社流光追遠是加密印迴復介社閒生元臣功昭于前人德合於大君建中癸亥翠華西狩公以大司馬艱貞翼從部勒戎車揣摩殺機勤勞行內爲上心膂登壇授律誓命交感如漢拜淮陰侯故事而又加焉乃進左揆遂參大政總賦輿而爲之師長恢王略而以之北伐凶黨盡銳壁于武亭公以事鉅師老則傷威重正合奇勝在於疾力奮寡擊衆鼓行無前殲夷潰溺如建瓴水中堅席勝又復於咸陽長轂啟行旣闢于延秋會西平王以東諸侯之師清宮獻捷公乃抑其賈勇須彼成功

室士心之剋伐息兵火之氣燄然後窮追斬級寇孽以平備法從於清蹕捧大明於黃道告廟薦功登拜上臺撫封尹正復與虜确時北平王出大鹵收絳臺而公已總成師下左輔於是輯忠力揚奇鋒復離宮拔堅壘衝陣壓境傳于蒲津金鼓之聲氣相合山河之表裏皆復渠魁授首師帥協附安流以濟方軌而前士不罹傷工不易肆二寇正刑四方咸齎論道進律乃平水土秉誼靖人以修班制休嘉賁于草木利澤逮于鰥寡言爲軍志動爲吏師貞元景子政成一紀進掌邦教遂居右弼十五年冬寢疾十二月辛未薨于理所享年六十四皇上悼歎不視朝五日冊贈太師贈祿弔祠有司備物大僚襄事明年二月甲申葬我太師于萬年縣洪固原太常跡其功德奏諡曰忠武禮也初公年十一以將門子仕於邊部未弱冠五遷至左驍衛將軍始從朔方之師戰黑山次從隴右之師摧石堡又嘗西出臨洮奪昆夷之善地而爲之壁壘北絕大漠破獫狁之堅甲而焚其廬帳又從汾陽王臨淮王討反虜于

山東南攻贊皇北取真定射其特將李立節貫于左肩斃之又五
遷至太常卿皆以功次其閒開地于河曲以靜九蕃宣威于陝西
乃定三川凡王師之所以剋獲都邑元老之所以發揚蹈厲公必
居其先偏而當其勅劇故以御史中丞爲靈州左司馬以御史大
夫爲邠州刺史以工部尙書爲單于大都護專征上郡榆林之地
入爲左金吾衛大將軍又以戶部尙書奉普王出車之重自時厥
後投艱感慨能納大忠以恤大事理蒲十六年再陟公台以司空
兼侍中以司徒兼中書令大凡歷官二十八次眞食千八百室居
節制者五副元帥者四材力絕人始封樓煩方內洽平乃建咸寧
凡汾陽王九伐之勳公皆左右四履之地公皆踐歷憫冊師禮法
諡尊名公皆如之所不至者壽而已矣惟公厚性寬中智謀深靜
秉義類以賦明命植端誠以紉王慝講功述職遠意長利執德之
柄蹈禮之輿致其用以格天啟其心以沃聖協建皇極爲宗工元
龜雅好左氏春秋班氏史得考父之恭范宣之讓驃衛之功略黃

韓之教化又嘗慕太史公敘著行紀一篇詞不矜大而事皆明備
有子五人曰殿中少監鍊太子中允鎬太子司議郎鉅櫟陽尉綱
雲陽尉鐵著位于兩宮以奉朝請試吏于縣內以修事任食德而
才稟訓而忠皆以純孝致其哀敬令弟輔國大將軍右領軍衛將
軍武當郡王玘與諸孤等推烝彝景鍾之義因識表以聞有詔詞
臣刻石傳信乃采其贊書侯表作神道碑銘曰
北戴斗極陰方尙武立金朱幡錫命都府太師開代感會雲雨四
征庇人九合尊主昔未成童則能肆勤卓行深入致果忘身弱冠
摧鋒環列南軍中興之後書社策勳援枹兩河轉戰三秦靈朔郁
邠所居必聞出統藩衛入司徼巡時丁阨難節冠羣倫連誅煽結
狂穢官闕西平鞠旅公亦授鉞旣臨延秋如火烈烈休士退舍時
惟不伐祲沴乖方蒲津未通北平釋位公實撫封胥命長春克成
厥功開壁勞軍靡有不公以律則臧在和而克時惟太師有嚴有
翼乃敷仁澤乃布條職時惟太師有功有德三公二府是獎是陟

綈印易名以尊以飾材官介士函簿悽惻大隧鮮原終南之北萬
邦作憲永代是式追琢馨香與唐無極

唐司徒兼侍中中書令許國公贈太尉韓公神道碑銘

并序

韓愈

韓姬姓以國氏其先有自潁川徙陽夏者其地於今爲陳之太康
太康之韓其稱蓋久然自公始大著公諱弘公之父曰海爲人魁
偉沈塞以武勇游仕許汴之閒寡言自可不與人校眾推之爲鉅
人長者官至游擊將軍贈太師娶鄉邑劉氏女生公是爲齊國太
夫人夫人之兄曰司徒立佐有功建中貞元之閒爲宣武軍帥有
汴宋毫潁四州之地兵士十萬人公少依舅氏讀書習騎射事親
孝謹俛俛自將不縱爲子弟華靡遨放事出入敬恭軍中皆目之
嘗一抵京師就明經試退曰此不足發名成業復去從舅氏學將
兵數百人悉識其材鄙怯智勇指付必堪其事司徒奇之士卒屬
心諸老將皆自以爲不及司徒卒去爲宋南城將比六七歲汴軍

連亂不定貞元十五年劉逸淮死軍中皆曰此軍司徒所樹必擇
其骨肉爲士卒所慕賴者付之今見在人莫如韓甥且其功最大
而材又俊卽柄授之而請命於天子天子以爲然遂自大理評事
拜工部尙書代逸淮爲宣武軍節度使悉有其舅氏司徒之兵與
地眾果大悅當此時陳許帥曲環死吳少誠反自將圍許求援於
逸淮且啗之以陳歸汴使數輩在館公悉驅出斬之選卒三千會
諸軍擊少誠許下少誠失勢以走河南無事公曰自吾舅歿五亂
於汴者吾苗疇而髮櫛之幾盡然不一揃刈不足令震駭命劉鏐
以其卒三百人待命於門數之以數與於亂自以爲功并斬之以
徇血流波道自是訖公之朝京師二十一年莫敢有讎呶叫號于
城郭者李師古詐言起事屯兵于曹以嚇滑帥且告假道公使謂
曰汝能越吾界而爲盜邪有以相待無爲空言滑帥告急公使謂
曰吾在此公無恐或告曰翦棘夷道兵且至矣請備之公曰兵來
不除道也不爲應師古詐窮變索遷延旋軍少誠以牛皮鞵材遺

師古師古以鹽資少誠潛過公界覺皆留輸之庫曰此於法不得以私相餽田弘正之開魏博李師道使來告曰我代與田氏約相保援今弘正非其族又首變兩河事亦公之所惡我將與成德合軍討之敢告公謂其使曰我不知利害止知奉詔行事耳若兵北過河我即東兵以取曹師道懼不敢動弘正以濟誅吳元濟也命公都統諸軍曰無自行以遏北寇公請使子公武以兵萬三千人會討蔡下歸財與糧以濟諸軍卒擒蔡姦於是公爲侍中而以公武爲鄜坊丹延節度使師道之誅公以兵東下進圍考城克之遂進迫曹曹寇乞降鄆部既平公曰吾無事於此其朝京師天子曰大臣不可以暑行其秋之待公曰君爲仁臣爲恭可矣遂行既至獻馬三千匹他錦綺纈又三萬金銀器千而汴之庫廩錢以貫數者尙餘百萬絹亦合百餘萬匹馬七千匹糧三百萬斛兵械多至不可數初公有汴承五亂之後掠賞之餘且斂且給恒無宿儲至是公私充塞至於露積不垣冊拜司徒兼中書令進見上殿

拜跪給扶贊元經體不治細微天子敬之元和十五年今天子即位公爲冢宰又除河中節度使在鎮三年以疾乞歸復拜司徒中書令病不能朝以長慶二年十二月三日薨於永崇里第年五十八天子爲之罷朝三日贈太尉賜布粟其葬物有司官給之京兆尹監護明年七月某日葬于萬年縣少陵原京城東南三十里楚國夫人翟氏附子男二人長曰肅元某官次曰公武某官肅元早死公之將薨公武暴病先卒公哀傷之月餘遂薨無子以公武子孫紹宗爲主後汴之南則蔡北則鄆二寇患公居其間爲己不利卑身佞辭求與公好薦女請昏使日月至旣不可得則飛謀釣誘以間染我先事後情壞其機牙姦不得發王誅以成最功定次孰與高下公子公武與公一時俱授弓鉞處藩爲將疆土相望公武以母憂去鎮公母弟充自金吾代將渭北公以司徒中書令治蒲于時弟充自鄭滑節度平宣武之亂以司空居汴自唐以來莫與爲比公之爲治嚴不爲煩止除害本不多教條與人必信吏

得其職賦入無所漏失人安樂之所在以富公與人有畛域不為戲謔人得一笑語重於金帛之賜其罪殺人不發聲色問法何如不自為輕重故無敢犯者其銘曰

在貞元世汴兵五獠將得其人眾乃一榻其人為誰韓姓許公磔其梟狼養以雨風桑穀奮張厥壤大豐貞元元孫命正我宇公為臣宗處得地所河流兩壩盜連為羣雄唱雌和首尾一身公居其間為帝督姦察其嘖呻與其睨眴左顧失視右顧而踞蔡先鄆鉏三年而墟槁乾四呼終莫敢濡常山幽都孰陪孰扶天施不留其討不逋許公預焉其賚何如悠悠四方既廣既長無有外事朝廷之治許公來朝車馬干戈相乎將乎威儀之多將則是矣相則三公釋師十萬歸居廟堂上之宅憂公讓太宰養安蒲坂萬邦絕等有弟有子提兵守藩一時三侯人莫敢叛生莫與榮歿莫與令刻文此碑以鴻厥慶

唐故四鎮北庭行營節度使扶風郡王贈司徒馬公神

道碑銘并序

常袞

皇帝使常侍以故征西扶風郡王臣璘功行之錄詔門下侍郎平章事臣袞曰古諸侯大夫計功稱伐書于太常勒之彝器德勳高故其文懿事業實故其言遠有國之大經也納忠於王室豈褒紀之禮闕歟宜文其頌聲以昭示承休于豐碑焉臣謹按司勳之戎籍史官之年表而敘之云聖上稽黃虞之道以武功文德統御天下赫赫明明罔不率俾唯犬戎自擅寇于我西土而猶懷以威德久而寢驕時乃大稽命將考之令典惟三年夏六月庶邦百辟洎侯王列將咸會于明廷乃大誥于爾在位有能典我西師僉曰璘哉是用詔以鷹揚之命於夏有鸞旂瑀戈之賜公拜手稽首不敢辭難遂帥師朝那弭節涇流恢耀武威以臨于戎狄既至乃以戎服立于軍門之外奉敷天子之威命而訓于將軍列校六正五吏三軍之大夫曰惟昔盛明必有憂難其在殷高宗也有鬼方之征其在周文祖也有昆夷之患秦以安定北地戎狄內侮漢以金城

隴西氏羌入寇故遣率以守衛中國修戰而高尙武功國家道德
盛於殷周甲兵雄於秦漢亦有邊患尙勞睿謀則疆臣之罪也將
何以塞責誓將上奉神武之算下憑戎士之力鼓行而前殄殲羣
慝詞情抗厲風雲動色於是軍舉法以誓之令簡而一眾畏而服
雖嘍哨老將聞而竦然乃周覽其山川以備其戰守有若犀兕其
威猖狂其勇屹立而不動者持重之將統焉禦于水碓之衝蒙輪
超乘縵胡突鬢眈盼而橫奮者雄毅之將董焉捍于瓦亭之陰輕
軒飛翰闐闐桓桓隸於射聲校尉以出松谷百夫之特萬人之敵
屬於車師後部以殿銅城火渠門之旗舒於大回川雷密須之鼓
殷於都廬山周之以木樵校聯布之以藺石渠荅部勒旣定天地
肅然遂使魁健氣索猛鷲魂駭卻略引去不敢近塞故八年之間
再寇而已此皆親稟睿略協用武經前後獻功悉如宸旨方將大
復流沙遠收故地奪我良將罔卒西事以大厯十一年月日薨于
戎府春秋五十六天子廢朝而歎曰安得雄邊威敵之臣如扶風

乎遣中命以迎喪顧近侍而流涕其至第也百官會弔其遣奠也
五校啟行贈以車馬含有貝玉所以褒大勳也初公自二庭統甲
士三千赴鳳翔行在遂陳滅胡之策先皇帝奇之曰吾無憂於東
方也遂戰青渠陳澧水收二陝復三川衛南以百騎破五千河陽
以一旅摧十萬史朝義悉師自將大戰邙山國家以天下勁兵夾
攻未動公獨率所部不陣而馳偃旗先登闕如虓虎鬪酣披靡橫
貫而出迴戈奮擊虜陣始破交突數合轟然大潰時副元帥太尉
光弼壯之曰吾用兵三十年未見以少擊眾雄捷之若此每有征
伐大計悉咨訪焉斯亦羣帥之傑旣而移軍右輔疾援河西固已
離之心存將棄之地及聞僕固懷恩之變卽日旋師萬類千羣延
蔓山谷輕行轉鬪虜殺而歸屈于岐都寇已四合公乃持滿外嚮
空入懸門未及解甲背城出戰戎師北走數騎前追背血橫灑朱
殷金甲槁戟而墜應弦而倒者數千萬人可謂三軍之絕也至於
理鄭國撫潁封化郇邠寧上郡勤於藩職惠於長人勞俸流庸贍

卹孤老縑綜緜績工於織紝入而有制故大東之刺不作禾麻菽
 麥業於播藝用之有節故自北之化可懷此又列郡之率化也公
 字某扶風人也自秦漢至於國朝公卿大將軍通侯二千石踵武
 王室休有烈光曾祖昭朝散大夫新豐縣令祖正會右威衛將軍
 扶風郡公贈光祿卿父晟左司禦率府兵曹參軍贈太子少保忠
 孝在門文武繼代宦婚之盛士族有輝惟公勳胄華茂雄姿高爽
 少有四方之志以才氣自任擺落凡格不嬰細微故弋獵畋漁嘯
 咤川澤年二十讀伏波傳至大丈夫當於邊野以馬革裹屍而還
 慨然而歎曰豈使吾祖勳業墜于地乎由是愾憤邊戎徘徊孤劍
 遂西至絕域以奇功累授裨將歷金吾將軍殿中監太保御史中
 丞遷御史大夫領北庭行軍使邠州刺史加工部尚書節制涇原
 以鄭穎二州隸之尋拜右僕射知省事階至儀同進封異姓副軍
 以降略而不書以英明之識遇聖明之運故得竭其智謀極其任
 遇抗大節以激危難攄洪仁以庇傷殘公之理軍也以穰苴兵法

孫子十三篇先以正合終以奇勝閑廓深邃應變無端與之安與
 之危故可合不可離同其敗同其成故樂死不樂生至於木罌濟
 河登山拔幟解鞍而臥鞭馬而馳兼之有餘亦不差異嘗以家財
 二百萬贍三軍與其散己食於行伍陳賜金於廊廡何相去之遠
 哉公之事君也奉之以實納之以忠造膝前籌詞理明順檢身無
 過恭謹畏慎祿賜所加則受小辭大任使所及則履險讓夷以忠
 材而親重有絳侯之遇也以簡質而倚愛有吳漢之信也所謂國
 之神將朝之蓋臣終慶於家永於福祚鍾石享於祖考帶礪傳於
 子孫宜哉嗣子盱等重族之盛隸業承家哀哀喪痛結天壤萬
 家葬地能誠昔賢十里邱封亦非遺志獲承君命欽率朝經請諡
 嘉名謂之合禮銘曰
 峨峨雍城積高氣靈氣主金行良將乃生琅琅司徒雄略縱橫耽
 耽其視震震厥聲四方靜難二紀操兵初奮厥武車師戎府鐵馬
 蛇矛大黃白羽天山瀚海歎薄風雨驍騎三千披荆謁主從我撫

軍擊胡滅虜迴戈涼野解敵岐下烈烈英風橫飛西土遂佩珩璜
分雄檠戟寵臨方鎮迺迺赫洪稜遐振虜氣外折惠化滂流人
心內結昆夷先零白旆至涇受算宸展朱旗撫征密陰前塞義渠
故城邱巒陵谷遠近相屬澶漫傾合紆餘迴復野戰高秋金羈馳
逐左揮右射虎捷神速番渠愕視百姓推伏國于扶風祚爾嘉庸
位長庶寮雁行三公王用蕃錫我有鼓鍾叔父昆弟燕私豈豈功
成身歿寵厚厥終周漢二宣皆有勞臣北征西討出車鑾麟今我
司徒實同厥勳勳在王室光昭後昆

唐贈司空范陽大都督忠烈公李公神道碑銘并序

楊炎

秦霸也張祿去魏漢興也淮陰離楚龍鳴風雨之會蛇變泥蟠之
中逶迤感通精氣相合斯冥契也豈人力也皇唐贈司空范陽大
都督李公諱楷其本出於隴西八代祖節後魏雁門太守燕齊之
亂族沒鮮卑東遷號良將之家北部實大人之種其生渤海其居

戴斗海塞迴抱興公之氣天星下直爲國之祥英氣混茫熊據龍
驤望其形得山河之狀觀其銳見金鼓之威神明爲徒義勇爲器
久視中以驍騎歲入于遼西臨太原南震燕趙雲火照于河上天
兵宿于北門朝廷憂之有命招諭合以信誓際於天人話言感寤
撫劍歎息是歲以控弦之士七百騎垂橐入塞解甲來朝以其本
枝復賜李氏授玉鈐衛將軍左奉宸內供奉圖形雲閣之中置酒
蓬萊之上君臣相賀羽衛生光君子曰井谷不可以游龜龍蟻垤
不可以戴松柏漢於是始靖虜於是始憂是後殫秣鞅于鴨綠之
野覆林胡于榆關之外北出障塞懷其王庭南救河源復其死地
石壑之役以一旅定三軍冷陪之師以虛聲破精勁東封之歲外
將天軍河湟未寧西護監牧雲麾鐵騎山動地踊右據清海北登
狼山冰泮則會師風高則出塞皇威振于四海王化敷於無外故
得大命三錫天馬輅驂定國難者兩朝拖侯服者四紀會兵車者
百勝出帳下者千人國有事未嘗不勤勞無私可謂知禮於戲天

道曖昧胡星未殞以營平之年不終大用以伏波之病再出窮荒
天寶元年五月二十日自河源薨于懷遠縣之師次春秋六十七
贈營府都督明年詔葬于富平縣壇山原維公智之大竇神之異
門心和體剛慮遠精徹思乎耳目之外行乎變化之中震呼戎獯
嘯吒風雲貔虎之悍以禮成百萬之強以謀勝故鮮卑因之以疲
中國天后取之以空大漠於中宗開朔方之地四百里於睿宗食
佐命之邑三千戶於玄宗則主禁衛吞諸戎東西南北動罔不剋
禦戎安邊凡十命焉祚于後也元子太尉中書令東都河南江淮
等道副元帥臨海郡王光弼少子太保御史大夫渭北鄜坊等州
節度使武威郡王光進負河圖以列四星遇英主而當三傑肅宗
之功復區宇更爲桓文今上之道訓華夷並爲召畢乾元中天子
以公炳德丕赫積仁流慶大福再成沒而不朽乃命太常追考功
績諡曰忠烈贈司空范陽大都督夫人贈號韓國夫人於是建廟
堂命宗紀室有山龍之服樂有鍾石之和昭宣令圖是有銘篆銘

文粹卷五十一

三十一

十一

曰
茫茫上象降精于北是生純臣其在異國矯矯府君蔚其英靈蛇
蟠北極鵬化南溟來于本邦會此天庭風驅虎旅晝食狼星綿綿
塞草天隔華夏北距陰山野無胡馬殊勳大績玉劔立社天摧武
庫海圻崑崙在昔遺慶惟魯臧孫曰聖在天勤于至道旣命太尉
又崇太保一門四龍二作元老赫赫元老氣含清真白髮重冠高
堂有親帝命韓國祚于夫人亦詔薊邱下寵明神彼邱之榛此石
之磷悠悠令德萬古清塵

隴右節度大使贈涼州都督郭公神道碑銘 并序

張說

四序平分清秋之氣勁五方異俗崆峒之人武故隴上多豪山西
出將其有雲龍感召星象特生金鼓登壇隱如敵國麾幢指塞自
比長城得之於太原公矣公諱知運字逢時其先太原著姓今則
晉昌人也本乎文王之弟是爲虢叔虢或云郭因而氏焉自燕昭

文粹卷五十一

三十一

尊隗以築宮漢祖封亭以列國其侯于陽曲宅彼太原舊矣亭之
玄孫友從太原徙隴西昭帝分隴西置西平郭氏又爲郡之右族
友之昆孫武威太守憲憲之猶子散騎常侍芝俱有名跡見於魏
晉則晉昌諸宗散騎之後也爾乃一門連譽時人號曰三儒四海
齊名天下謂之八凱光祿派分於馮翊廷尉世茂於潁川孝則天
錫釜金忠則帝章冕服仁則猛獸不害信則童兒不欺豈直介休
見有道之碑洛陽聞立德之傳而已曾祖欽瓜州大黃府統軍上
柱國祖才朝議郎瓜州常樂縣令上柱國父師朝散大夫上柱國
贈伊州刺史積鹵之地戎馬生郊業戰鬪而弘勳仕州縣而爲達
啟莫京之繇福不在於其身積無聲之善慶必流於後嗣公太白
之精雷泉之靈膺家之禎爲國而生身長七尺力能扛鼎猿臂虎
口虬鬚鶚麟射穿七札劔敵萬人子卿路逢遙識將軍之相唐舉
一見足辨封侯之骨解褐以善戰授昭武校尉秦州三度府左果
毅以敗狄北庭加游擊將軍沙州龍勒府折衝兼右金吾郎將瀚

海軍副使尋改朝散大夫伊州長史伊吾副使以軍累破虜卽授
其州刺史進當軍經略使朝廷以未愜前除且有後命遷本衛中
郎將仍舊爲州軍使默啜之寇北庭也公奔命解圍軍聲大震加
雲麾將軍右武衛將軍封介休縣開國公食邑二千戶開元二年
吐蕃入隴右掠珂牧公兵以奇勝寇不復蹤積甲山齊而有餘牧
馬谷量而未盡歸功廟算朝議多之拜左羽林將軍持節隴右諸
州節度大使兼鄯州都督河源軍使鎮西陲信國之藩屏坐北落
亦王之爪牙故入奉期門而出寄分闔於是料敵無備間其師老
潛軍一舉大俘九曲鎖甲文劔焚馬犛牛旣獻戎捷遂頒朝賜乃
兼鴻臚卿攝御史中丞改封太原郡開國公加前食邑三千戶執
憲總軍典屬乘障增爵益邑遇厚恩深俄而六州羣胡相率大叛
命公統隴右之騎濟河曲之師鋒鏑爭先玉石俱碎拜左武衛大
將軍授一子官賜金銀器百事雜綵千段班師臨洮邁茲虐疾嗟
乎匈奴未滅宿志不申生也有涯死而猶視開元九年十月二十

六卷五十一
二日薨於軍舍春秋五十有五蕃夷邊鎮血面椎心悲慘風雲號
勸山谷豈非良將視人如子人亦視猶父乎皇帝憫焉詔贈涼州
都督米粟五百石錦帛五百段命都水使者張景佚備物護葬遵
朝典也惟公氣猛而性和量寬而精銳沈謀可以掩著蔡雄斷可
以奪鬼神故常糟粕韜鈴芻狗風角然其樹恩結信立威用武烜
赫如風濤震盪如雷雨戰必克攻必取每有奏謁帝特稱歎孝文
之得魏尙虜不足憂太祖之見郭嘉知成吾事前後錫錦衣寶帶
文馬素女爛其盈門長鳴在殿感知己之主陳必死之力皇情西
顧則九羌疊鼓詔書北伐則六狄焚旗上成聖君之立鑿下效武
臣之素節其竟也如此夫爲人子立廟致敬祖考來格不亦孝乎
爲人臣恢疆禦侮以勞定國不亦忠乎若然者歸義方於先人揚
令名於後代可也嗣子英傑起復定遠將軍左領軍衛翊府中郎
將假紫服金章河西節度副大使英奇朝散大夫前尙輦奉御英
協游擊將軍前京兆府勵行府右果毅都尉英彥朝議郎前左衛

冑曹參軍等咸善居喪而過哀或從王事而奪禮則知辛賢父子
繼位將軍祭彤弟兄並參師律去本不戀達也而新是謀權也嘉
此武功創其宅兆以十年七月葬我太原公夫人燉煌索氏祔焉
禮也皇上念功以惜逝厚終以遇存有詔詞人爲其碑誌介士送
葬卽封征虜之墳單于入朝當祭度遼之墓銘曰
沈沈將軍雄略冠羣平西征北震戎懾獯亭障臥鼓屯田饋軍仗
此白刃致彼青雲郭侯宴喜旣多受祉立牡黻衣清廟蠲祀鼎食
金奏炮鼈膾鯉旣來不庭有嚴天子流沙博望羽林飛騎河曲迴
兵臨洮舊防手握金節魂沈玉帳千里送喪三軍悽愴詔葬禮崇
恩碑義豐生爲神將死爲鬼雄身世一滅榮華萬空祁連之墓長
旌武功

唐故邠寧慶等州節度觀察處置使朝散大夫檢校戶
部尙書兼御史大夫賜紫金魚袋贈右僕射史公神
道碑銘并序
劉禹錫

僕射名孝章字得仁本北方之強世雄朔野其後因仕中國遂爲靈武建康人曾祖道德贈右散騎常侍封懷澤郡王祖周洛銀青光祿大夫檢校太常卿兼御史中丞北海郡王贈太子太保考憲誠早以武勇絕人積功至魏博節度使終于河中晉絳慈隰等州節度觀察使檢校司徒兼侍中河中尹贈太保其薨也大臣中書令晉國公裴氏爲之碑其名益顯公卽侍中之元子母曰冀國夫人李氏幼而聰寤父母賢而加愛焉及長好學遷善秀出儕輩鄴下諸兒號爲書生元和中太尉愬爲魏帥下令掄材於轅門取大將家翹秀者爲子弟軍列於諸校之上公獨昌言願效文職太尉深奇之遂假魏州大都督府參軍長慶二年常山眾叛害其帥沂國公田司徒于帳下沂公發迹于魏人猶懷之詔命其子布以尙書授鉞統魏兵問罪于北疆且報家禍布旣啟行士氣不振渙然內潰獨與宄從之旅偃旗而歸百憤攻中卒自引決先侍中時爲中軍都知兵馬使兼御史中丞全師在野鬪然推戴之請爲假侯

以鎮定中貴人飛騎上聞穆宗夜召翰林學士草詔書以眞侯命之實有魏土從眾而合權也是歲公自攝官轉本府士曹參軍兼監察御史賜朱衣銀印推恩以及子也一旦跪于父母前進苦言曰臣竊惟大河之北地雄兵精而天下賢士心悔之目河朔閒視猶夷狄何也蓋有土者多乘兵機際會非以義取今臣家父侯母封化爲貴門君恩至矣非折節礪行彰信于朝廷無以弭識者之譏寤明君之意節著於外福延於家乘時蹈機禍不旋踵言訖泣下數行父俞母贊天性交感三心旣叶萬眾潛化天子聞而嘉之曰彼眞有子乃授檢校太子左諭德兼侍御史充節度副使累遷至散騎常侍兼御史大夫賜金印紫綬旣貳軍政事如命卿弛張損益得以參決潛革故態人知嚮方大和二年滄景節度使李全略卒其子同捷竊據故地詔下以文告弗革遂用大刑先侍中表請率先諸侯使元子以督戰制曰可公承君父之命乃捐其軀一舉而下平原壓滄壘由是加工部尙書及王師凱旋上表願一識

承明廬詔允之遂赴闕下得覲於便殿上曰嚮吾始征滄州議者皆曰彼魏之姻也慮陰爲寇謀吾發使數輩以偵之其還也僉曰爾父瀝款于賓筵爾母抗詞于簾下願絕姻以立效其經始啟發出于爾心今滄海砥平策勳之日宜貴爾三族命爾父爲侍中遷鎮于近地加爾禮部尚書析相衛瀘三州爲鎮以居之俾爾一門大榮以誇天下公拜稽首謝父遷讓己爵禮無違者翌日詔見于明庭人咸曰史氏之寵光古無有也牙旗碧幢方指東道侍中以帳下生變聞泰極而否當歌而哭迎柩于路仰天長號因葬于洛陽之北邙山冀國夫人耐焉寢苦枕塊以所仇同天爲大酷未幾詔舉金革之義起爲右金吾將軍累表陳乞有司以違命督之與疾卽路閒歲擢授鄜坊丹延等州節度觀察處置等使居四年遷鎮于滑一歲入爲右領軍衛大將軍旋改右金吾大將軍又授鉞于邠土孟秋至治所首冬邁疾拜章入覲不克展和鸞鞞革之儀薨于靖恭里之私第享齡三十有九當開成三年十月二十日上

聞而悼之不視朝一日贈尚書右僕射明年二月歸葬于洛都夫人瑯琊王氏耐焉繼室深澤縣君博陵崔氏有一子曰渙生七年而孤僕射之喪自復魄至葬當門戶備祭祀建碑表皆縣君之能且命其家老具事功來請曰嫠不恤家而憂幼嗣不知其先人之官業乞辭以傳于後也君子以爲知禮謹書之銘曰
斗極之下崆峒播氣鍾于侍中孔武且貴奉上致命宜昌後嗣僕射承之良弓不墜耳煩鉦鼓心悅文字虎穴之中生此騏驥大和紀元滄景不虔子弄父兵跳跟海壖有鄰陰交蝟起雜連詔下薄伐良隅騷然時惟侍中實統魏師蓄銳未發眾心危疑僕射爲子陳謀盡詞興言涕零有感恩慈絕姻效節精貫神祇滄波底寧王命褒之乃遷元侯來鎮近畿乃祚元子別建旌麾一門四節輝耀當時倏忽變生魏郊紛披喬木雖大盲風不知干雲之臺烈缺焚之哀哀孝嗣丁此大酷迎護幃轉葬于東洛訴天觸地血染縗服禮有金革詔書敦促不遂枕戈驟膺推轂雕陰白馬暨于邠谷雖

榮三鎮不荷百祿綺紈之間珪組纍纍如彼晨葩日中而萎有妻依男
名家有子稚齒行號執禮歸窆蒿里洛水之陽修邛之趾尊卑穆
敬幽顯同理舊松新柏亦象橋梓刻石紀功垂千萬世

文粹卷第五十七

文粹卷第五十八

吳興 姚鉉 纂

碑十 總七首

庶官

唐刑部尚書致仕贈尚書右僕射太原白公墓碑銘李商

唐尚書吏部侍郎贈司空奚公神道碑銘劉禹錫

唐左拾遺翰林學士李公新墓碑銘范傳正

唐故朝請大夫吏部郎中上柱國高都公楊府君碑銘席

牧守

唐故常州刺史獨孤公神道碑銘崔補甫

故饒州刺史吳府君神道碑銘白居易

唐故通議大夫和州刺史吳郡張公神道碑銘

唐刑部尚書致仕贈尚書右僕射太原白公墓碑銘并

李商隱

公以致仕刑部尚書年七十五會昌六年八月薨東都贈右僕射
十一月遂葬龍門子景受大中三年自潁陽尉典治集賢御書侍
太夫人弘農郡君楊氏來京師胖胖兢兢奉公之遺畏不克既乃
件右功世以命其客取文刻碑文曰

公字樂天諱居易前進士避祖諱選書判拔萃注祕省校書元年
對憲宗詔策語切不得為諫官補整屋尉明年試進士取故蕭遂
州泮為第一事畢怙集賢校理一月中詔由右銀臺門入翰林院
試文五篇明日以所試制加段佑兵部尚書領涇州遂為學士右
拾遺滿將擬官請掾京兆以助供養授戶曹時上愛兵襄陽荆州
入疏獻物在約束外公密詆二帥且曰非善長後雖與宰相不厭
聲禍其後禮官竟以多殺不辜諡于頓為厲李道古襲父事逆務
作項領以謾儕曹上錢六百萬贖文貞故第以與魏氏公又言文
貞第正堂用太宗殿材魏氏歲臘鋪席祭其先人今雖窮後當有
賢即朝廷覆一瓦魏氏有分彼安肯入賊所贖第邪上由是賜錢

直券以居其孫在職三年每讌見多前笏留上輦是否意詔湔剔
挾摩望及少年見天下無一事五年會憂掩坎廬墓七年以左贊
善大夫著吉武相遇盜殊絕賊棄刀天街日比午長安中盡知公
以次紙為疏言元衡死狀不得報即貶江州移忠州刺史穆宗用
為司門員外四月知制誥加秩主客真守中書舍人敘緋受旨起
田孝公代恆陽孝公行贈錢五百萬拒不內燕趙相殺不已公又
上疏列言河朔畔岸復不報又貶杭州既至築隄扞江分殺水孔
道用肥見田發故鄴侯泌五井淳儲甘清以變飲食循錢塘上下
民迎濤祠神伴侶歌舞徙右庶子出蘇州授祕書監換服色遷刑
部侍郎乞官分司得太子賓客除河南尹復為舊官進階開國九
年除同州不上改太子少傅申百日假又二歲得所薨官白氏由
楚入秦秦自不直杜郵事封子仲太原以其後祖某鞏縣令考
季庚襄州別駕贈太保一女妻譚氏始公生七月能展書指之無
二字橫縱不誤既長與弟行簡俱有名故李刑部建庾左丞敬休

友最善居家以戶小飲薄酒朔望晦輒不肉食攜鄧同章楚白服
遊人間姓名過海流入雞林日南有文字國爲中書舍人三日如
建中詔書上鄭公覃自代後爲相稱質直文宗時文貞公果有孫
起使下數歲至諫議大夫賢可任爲今上御史中丞他日景受嘗
跪曰大人居翰林六同列五且爲相獨白氏亡有公笑曰汝少以
待其曾祖弟今右僕射平章事敏中果相天子復憲宗所欲得開
七關句城守四州以集巨伐仲冬南至備宰相儀物擊跪齋粟給
事寡嫂永寧里有兄弟家指嚮健慕以信公知人集七十五卷
元相爲序系曰
公之世先用談說聞肅代代一作優布蹤河南陰德未校公有弟
昆本跋不搖乃果敷舒匪脩匪臆反烏介其醇腴于鄉泊邦取用
不窮天子見之層陛玉堂徵徵其中上汰唐禹帝爲輦留續緒襲
縷歲終當遷戶曹是取睦白其華嚼不痕緇聲上用從棄遣至道天
子疇誰與伍率中道止納筆攝麾綽三郡理既去刑部條東其居

大尹河南翦其暴逋君有三輔臣有田畝臣衰君強謝不堪守翊
翊伸伸君子之文不僭不怒惟君子武君子既貞兩有其矩孰永
厥家曾祖之弟坤柄異繩以就大計匪哲則知亦有教詔益褒其
收摠莠而導刻詩於碑以報百世公老於東遂葬其地

傷子辭

弘農楊氏

子有合子儉衣削食以紀先功志刊貞石彼蒼不遺俾善莫隆今
子建立痛究無窮

唐尙書吏部侍郎贈司空奚公神道碑銘 并序

劉禹錫

嗚呼有唐清臣尙書吏部侍郎奚公貞元十五年十月甲子薨于
位詔贈禮部尙書太常考行諡曰某是歲臘月丁酉葬于萬安縣
之某原後三十有四年子爲諸侯爲大夫門戶有煒於是門下生
琢石紀德揭于新阡云公諱陟字殷衡其先在夏爲車正以功封
于薛下古以降爲譙郡人或因仕適楚復之秦今爲京兆人隋唐

之際再世以明經爲博士家有賜書曾祖簡亦以文學爲太子司
議郎大父乾繹仕至光州刺史烈考諱某有道而尙晦終徐州司
功參軍贈和州刺史由子貴也天以大運生萬物而以正氣鍾賢
人至和來宅其德乃具公實有焉幼而擢陵茗之秀長而成清廟
之器羣倫月旦咸以第一及從鄉賦洎昇名太常果居上第明年
詔郡國徵賢良設四科以盡材公居文詞清麗之目授弘文館校
書郎時德宗新卽位聲烜虜庭西戎畏威底貢內附詔諫議大夫
崔河圖持節卽虜帳以報之使臣欲盛其賓寮以自大遂嘿表公
爲介授大理評事除書到門公方爲人子不敢許以遠稱病弗果
行歸寧壽春養志盡敬丞相楊炎勇于用才擢公爲左拾遺奉安
輿而西未幾再集茶蓼居從後喪將闋是歲建中四年京師急變
黃屋順動狩于巴梁公徒行間道以歸王所旣中月而詔授起居
郎充翰林學士創鉅愈遲病不拜職改太子司議郎從大駕迴入
尙書爲司金元士且參推筦之務有頃持愍冊宣恩于薊門將行

錫銀朱于青蒲上復命稱旨轉吏部員外郎是曹在南宮爲眉目
在選士爲司命公執直筆閱簿書紛挐盤錯一瞬而剖時文昌缺
左右丞都曹差重遂轉左司郎中尋遷中書舍人執事者繫公識
精以斟酌大政非獨用文飾也會江淮閒民被水禍上愍焉特命
公宣撫之許以便宜及物赤車所至如東風變枯條其利病復奏
咸可轉刑部侍郎時主計臣延齡以險刻貴倖而與京兆尹相惡
以危事中之坐譴已又逮繫其吏峻繩之事下司寇主奏議者欲
文致而甘心焉公侃然持平挫彼嶽嶽君子聞之善其知道不私
刑曹旣清以餘刃兼領選事居一年授權知吏部侍郎又一年卽
真是秩言能審官者本朝有裴馬盧李四君子物論以公媿焉時
得疾發癰有國醫方直禁中上促遣如第且救之曰某賢臣也悉
術以治之及有司以不起聞上震悼加等娶瑯琊王氏石泉公之
曾孫友壻皆一時彥士長子某蚤不祿第二子敬則歷太僕少卿
今爲濮州刺史兼御史中丞賜金紫以連最就加貴秩俾視九卿

第三子敬立以詞藝似續登文科歷左補闕今爲尚書刑部郎中
第四子貝舉進士最小子咸砥礪纂修宜爲名公家子其邁德垂
裕之光乎公少以名器自任及顯達急於推賢視其所舉則在西
省薦權丞相由右掖掌訓辭在中銓表揚僕射由地曹綜吏部二
公後爲天下偉人凡執文章權衡以揣量多士一入中禁考策詞
三在天官第章句披沙剖璞由我而顯者落落然居多推是風鑒
移于大治則鎔範之內無非祥金嗟乎天不遐其福而孤民望使
由庚之什不作於貞元中惜也初公旣終詔贈大宗伯後以第三
子在郎位被霑澤再追褒至司空故昔之葬儀用常伯而今之碑
制用三公云銘曰

仁麟智龍爲瑞一辰未若君子瑞于人倫惟唐德宗道類漢宣督
責繩下風稜言言公丁斯時籍在雋賢從難表節執羈而還帝曰
汝器黃流瑟然可爲大僚左右化源乃飾王度乃馳轡軒旣幹刑
柄亦操吏權陽和熙熙貯在顏閒守法持正疑如秋山火不侵玉
此
倖臣畏伏鳳鳴祥煙梟噪低跼帝方倚用天不假年公寐無寤其
名愈遠門人達者赤舄立袞公居甚卑其德愈尊兩子朝服駢驅
朱輪佳城何在胄貴之里螭首龜趺德輝是紀嗚呼後人下拜于
此

唐左拾遺翰林學士李公新墓碑銘

并序

范傳正

騏驥筋力成意在萬里外慙塊一蹶斃於空谷唯餘駿骨價重干
金大鵬羽翼張勢欲摩穹昊天風不來海波不起塌翅別島空留
大名入亦有之卽故左拾遺翰林學士李公之謂矣公名白字太
白其先隴西成紀人絕嗣之家難求譜牒公之孫女搜於箱篋中
得公之亡子伯禽手疏十數行紙壞字缺不能詳備約而計之涼
武昭王九代孫也隋末多難一房被竄于碎葉流離散落隱易姓
名故自國朝以來編於屬籍神龍初潛還廣漢因僑爲郡人父客
以逋其邑遂以客爲名高臥雲林不求祿仕公之生也先府君指

天枝以復姓先夫人夢長庚而告祥名之與字咸所取象受五行
之剛氣叔夜心高挺三蜀之雄才相如文逸瓌奇宏廓拔俗無類
少以俠自任而門多長者車常欲一鳴驚人一飛冲天彼漸陸遷
喬皆不能也由是慷慨自負不拘常調器度弘大聲聞于天天寶
初召見於金鑾殿立宗明皇帝降輦步迎如見園綺論當世務草
答蕃書辯如懸河筆不停綴立宗嘉之以寶牀方丈賜食於前御
手和羹德音褒美褐衣恩遇前無比儔遂直翰林專掌密命將處
司言之任多陪侍從之遊他日泛白蓮池公不在宴皇歡既洽召
公作序時公已被酒於翰苑中仍命高將軍扶以登舟優寵如是
布衣之遇前所未聞公自量疏遠之懷難久於密侍候閒自布衣
至候閒
二十三字從文
苑英華補入上疏請還舊山立宗甚愛其才或慮乘醉出入省
中不能不言溫室樹恐撥後患惜而遂之公以為千鈞之弩一發
不中則當摧撞折牙而永息機用安能倣碌碌者蘇而復上哉脫
屣軒冕釋羈韁鎖因肆情性大放於宇宙閒飲酒非嗜其酣樂取

其昏以自豪作詩非事於文律取其吟以自適好神仙非慕其輕
舉將以不可求之事求之其意欲耗壯心遣餘年也在長安時祕
書監賀知章號公為謫仙人吟公烏棲曲云此詩可以哭鬼神矣
時人又以公及賀監汝陽王崔宗之裴周南等八人為酒中八仙
朝列賦謫仙謔百餘首俄屬戎馬生郊遠身海上往來於斗牛之
分優游沒身偶乘扁舟一日千里或遇勝境終年不移時長江遠
山一泉一石無往而不自得也晚歲渡牛渚磯至姑熟悅謝家青
山有終焉之志盤桓利居竟卒於此其生也聖朝之高士其往也
當塗之旅人代宗之初搜羅俊逸拜公左拾遺制下於彤庭禮降
於立壤生不及祿歿而稱官嗚呼命歟傳正其生唐代甲子相懸
常於先大夫文字中見與公有潯陽夜宴詩則知與公有通家之
舊早於人間得公遺篇逸句吟詠在口無何叨蒙恩獎廉問宣池
按圖得公之墳墓在當塗邑因令禁樵採備灑掃訪公之子孫欲
申慰薦凡三四年乃獲孫女二人一為陳雲之室一乃劉勸之妻

皆編戶毗也因召至郡庭相見與語衣服村落形容朴野而進退
閒雅應對詳諦且祖德如在儒風宛然問其所以則曰父伯禽以
貞元八年不祿而卒有兄一人出遊一十二年不知所在父存無
官父歿爲民有兄不相保爲天下之窮人無桑以自蠶非不知機
杼無田以自力非不知稼穡況婦人不任布裙糲食何所仰給儷
于農夫救死而已久不敢聞于縣官懼辱祖考鄉閭逼迫忍恥來
告言訖淚下余亦對之泣然因云先祖志在青山遺言宅兆頃屬
多故殯於龍山東麓地近而非本意墳高三尺日益摧圯力且不
及知如之何聞之憫然將遂其請因當塗令諸葛縱會計在州得
諭其事縱亦好事者學爲歌詩樂聞其語便道還縣躬相地形卜
新宅于青山之陽以元和十二年正月二十二日遷神于此遂公
之志也西去舊墳六里南抵驛路三百步北倚謝公山卽青山也
天寶十二載勅改名焉因告二女將改適於士族皆曰夫妻之道
命也亦分也在孤窮旣失身於下俚仗威力乃求援于他門生縱

偷安死何面目見大父於地下欲敗其類所不忍聞余亦嘉之不
奪其志復井稅免徭役而已今士大夫之葬必誌於墓有勳庸道
德之家兼樹碑于道余才術貧虛不能兩致今作新墓銘輒刊二
石一寘于泉扃一表于道路亦峴首漢川之義也庶芳聲之不泯
焉文集二十卷或得之於時之士或得之於世之公族編輯斷
簡以行于代銘曰

嵩嶽降神是生輔臣蓬萊謫眞斯爲逸人晉有七賢唐稱八仙應
彼星象唯公一焉晦以麴蘖暢於文篇萬象奔走乎筆端萬慮泯
滅乎尊前臥必酒甕行惟酒船吟風詠月席地幕天但貴乎適其
所適不知夫所以然而然至今尙疑其醉在干日寧審乎壽終百
年謝家山兮李公墓異代詩流同此路舊墳卑庫風雨侵新宅爽
塏松柏林故鄉萬里且無嗣二女從民永於此猗歟琢石爲二碑
一藏幽隧一臨歧岸深谷高變化時一存一毀名不虧

唐故朝請大夫吏部郎中上柱國高都公楊府君碑銘

夫靈鎮三峰倚京師而西峙滎河一曲抱華陰而東注故川嶽氣交雲雨時出感降才傑紛綸元勳冠世為強家宅茲沃土者其惟弘農楊氏焉曰我伯胤厥自唐叔關中相府乘朱輪者十人洛下儒門登袞職者四代慶靈不隕以生我高都公公諱仲宣字曼後漢太尉震之二十代孫也自高祖至于大父並名播海內迹存朝端舊史前碑其詳之矣烈考皇孫刑部尚書魏國忠公元琰屬姦臣擅命明辟應期功濟中興安劉氏者周勃禮優歸老論叔向者祁奚出處全身忠貞盡節公即尚書府君之第三子也粵在幼齡夙有至性事魏公莒國夫人以孝聞宗族推稱州閭藉甚清真邁俗秀楚不羣氣和可親色厲難犯言必合禮動不違仁集七略之書名高漢閣作三都之賦價重洛城未弱冠以通經為修文生授右千牛光朝選也秩滿補太廟丞以親累出為蘄州司戶參軍屬先尚書辭滿告歸公罷官就養頴曲別業地連嵩高邱中有華孝

子絜白之興川上有水漁父滄浪之歌温清獲申隱淪兼逐橫為酷吏王勛所誣陷貶授雋州臺登縣尉劔南節度使益府長史韋抗奏公為管記飛書之急倚馬立成尋有詔停官歸侍俄丁尚書府君憂鞠凶而降哀毀骨立殆不勝喪取全於禮服闋從常調吏部侍郎魏奉古早以文伯期於王佐乃授河南府河陽縣尉尋應藻思清華舉今上親試對策甲科除蒲州司法參軍丁莒國夫人憂杖而後起公居魏公之喪也服闋不仕為叔父瑤所敦逼不獲已而應命其年糊名考判公居上等乃擢拜監察御史獬豸之角初見觸邪雞棲之車還聞嫉惡坐剛直出為汾州孝義縣令前宰無良下氓失業稼穡之地半為荒疇桑榆之人多在逋藪公曉諭歸本流亡盡復既富而教厥土有年故得雉馴郊田鸞降庭樹刺史蕭恕乃圖畫其像郵傳以聞天恩疇庸璽書褒美乃除華州下邽縣令辭疾罷職求歸養閒無何除河南鞏縣令所歷為政有逾於前尋遷禮部員外郎歷左司員外郎春官之屬以蘇神人左轄

之佐以正綱紀乃轉吏部員外郎九品之曹一臺之劇有簿書以
旌淑慝擇刀筆以決否臧於是乎以公滅私秉心匪石剖疑析滯
揮翰如流選部以清繁公是賴尋遷本司郎中乃統胥徒是稱小
選峻以風檢請託不行絕其關梁僥倖自息若乃見理之速持事
之堅雖有賁育之勇金張之勢曾無恐懼不可動搖不陟台階奄
先泉壤悲夫以開元二十九年七月五日遘疾終于萬年永寧里
之私第春秋四十有九以其年十月十七日歸葬于閩鄉牧馬原
禮也惟公自家刑國曰仁與義厚利者常流之所重公以先人邑
入盡分諸孤善交者眾人之所艱公以結下朋遊會無凡客士有
險詖比鄰不通人或急難傾家以濟素懷儉約雅好真如不服綺
紈不食葷血雖粉闈有閱朱紱斯皇不易貴賤之心能全始終之
節嗟乎譽高千載道屈一時漢之崔駰官終邑宰魏之管輅位止
府丞天乎與才而人乎無命自古所歎豈獨高都而已府君所著
文集十卷盛行於代嗣子輪行太常寺奉禮郎次子轅轍麟輯等

永惟過庭之訓式遵卜宅之禮靈輻戒道哀挽及關靈掌東拓地
惟鄉縣拱樹西靡心存帝京銘曰

河之靈華之精人之傑國之楨年不永位未亨閉泉路兮冥冥空
歲陰兮崢嶸

唐故常州刺史獨孤公神道碑銘 并序 崔祐甫

昔劉向稱賈誼言三代與秦亂之意其論甚美達於國體雖古之
伊呂未能遠過又稱董仲舒有王佐之才雖伊呂亡以加管晏之
屬殆不及也於戲二君以偉才當盛漢之崇而位止於下國二千
石祐甫聞於先君僕射曰主恩非臣下之所圖天命豈生人之所
制有唐碩量深識之士曰獨孤常州諱及字至之河南洛陽人皇
朝左千牛元慶之曾孫蔡州長史思暎之孫殿中侍御史贈祕書
監通理之第四子仕而遭時鵠立於朝建旗東夏三著嘉績嗚呼
痛乎奄忽捐館其時也大庾十二年夏四月二十九日其地也常
州之路寢其壽也五十有三年中朝名公素見知者後進之士聞

義嚮風者洎濠舒常三州之百姓莫不填膺流背不宴不相浹辰
彌月厚而惜之者往往失聲出涕迺若公有子朗郁等未齠齠厥
兄檢校水部員外郎兼侍御史汜方佐泚河東帥聞喪來奔半旬
而至惋毒之甚如不欲生既受吏人賓客之弔乃忍死謀事以六
月六日引使君之柩去常州歸洛陽其年歲次丁巳十月朔七日
葬我使君于河南府壽安縣某原先祕監之塋以夫人博陵縣君
崔氏附焉禮也水部曰天之降災害于我家仲叔季盡矣吾將老
矣吾弟常州之子未立今不刻石表墓則常州之令名何以傳於
後乃託我故人敘而銘之常州稟元和以生幼有成人之量祕監
府君親授以孝經常州一覽成誦祕監問曰汝志於何句對曰立
身行道揚名於後世是志也自是徧覽五經觀其大義不爲章句
學成童丁祕監憂勺飲不入口者累日先夫人同郡長孫氏諭以
不可滅性之義由是微進饋粥杖而後起既免喪加於人一等鄉
族稱其孝焉長孫夫人高行明識訓導甚至常州漸教成器卓然

有立著延陵論君子謂其評議之精在古人右天寶末以洞曉玄
經對策上第超拜華陰縣尉著古函谷關仙掌二銘格高理精當
代詞人無不畏服俄屬中原兵亂避地于越丁太夫人憂毀瘠過
禮既外除江淮都統使戶部尚書李峘奏爲掌書記授左金吾衛
兵曹參軍軍旅之事非其所好未幾返初服今上卽位下詔收俊
茂舉滯淹政之大者以公爲左拾遺凡所諫諍直而不訐婉而不
撓屬橐詭詞不傳於外遷太常博士時新平大長公主之子裴傲
尚永清公主初以太子少傅裴遵慶爲婚主將行五禮公實相焉
中使口宣詔旨易之大長公主後夫姜慶初常州曰婚姻之禮王
化之階以異姓之人主之不可甚矣某不奉詔中書令汾陽王時
爲五禮使從焉又百官薨卒定諡之際綜覈名實皆居其當與嚴
河南郢州答呂荊州譚諡議博而正當時躉之遷尚書禮部員外
郎受詔考第吏部選人詞翰旌別淑慝朝野稱正上方大卹黎庶
精選牧守以公爲濠州刺史平其徭賦恤其寃弱課績聞上加朝

散大夫遷舒州刺史舒境瀕江傍山羣盜所聚或蟠結林藪或越
趙城寺公惠以柔之武以警之釋矛服耒盡爲良俗其他如在濠
之政居一年璽書勞問就加尙書司封郎中錫以金章紫綬屬淮
南旱歉比境之人流庸甚眾公悉心以撫舒獨完安天子聞而休
之擢拜常州刺史常州當全吳之中據名城沃土兵興之後中華
翦覆吳中州府此焉稱大故朝之選牧恆屬意焉公宣中和平易
之教務振人毓德之體百姓蒙化遷善不知所以安而安吏不忍
欺路不拾遺餘糧棲畝膏露降之公平生聞人之善必揄揚之氣
盡與之不啻若身得之後進有才而業未就者教誨誘掖之惟日
不足公之文章大抵以立憲誠世衰賢過惡爲用故論議最長其
或列于碣頌流于詠歌峻如嵩華盛如江河清如秋風過物邈不
可逮公有集二十卷行於代若夫贊堯舜禹湯之命爲誥爲典爲
謨爲訓人皆許之而不吾試論道之位宜而不陟前是公之仲兄
季弟伯姊三年之間繼歿執天倫之喪如荼如蓼竟以無祿天何

不仁然則賈與董名位不盡其才吾先君之歎主恩天命斯見矣

其銘曰

常州之德孝行爲大蒸蒸翼翼以敬以愛友于兄弟如捧如戴常
州之義篤於朋友用之有常行之可久扶危拯溺爾身我手常州
之才施於有政撫柔三部以仁爲柄龔遂國僑千古迭映常州之
文究其元本質取其正豔從其損在星之緯在人之袞常州之年
止於中身去昭昭之盛世與萬鬼而爲鄰白馬江上青烏洛濱鵲
鴿在原嗟爾元昆縵衽霑血長號訴冤纂述遺美謂余不諉我覲
之子將二十年相投藥石胡疹不痊譬我於池子爲之泉譬我於
桐子爲之弦榮不獨遂難不隻全如何淑明摧馥碎堅斲衣楚挽
徘徊墓田望之不見赴之無緣狸首班如女手拳如天如天如泣
涕漣如

故饒州刺史吳府君神道碑銘并序

白居易

汨市朝溺妻子非達也困山林擯血屬非達也若有人與羣動處

一代閒彼爲彼我爲我不自潔不自污不巢許不伊呂水其心雲
其身浮沈消息無往而不自得者非達人乎吾友吳君嘗從事於
斯矣君諱丹字真存太子通事舍人覽之曾孫睦州司馬庶之孫
太子宫門郎贈工部尚書詮之長子以進士第入官歷正字協律
郎大理評事監察殿中侍御史太子舍人水部庫部員外郎都官
駕部郎中諫議大夫大理少卿饒州刺史歷職義成軍節度判官
浙西道節度判官潼關防禦判官鎮州宣慰副使甄函使階至中
大夫勳至上柱國賜紫金魚袋君讀書數千卷著文數萬言寶曆
元年六月某日薨于饒州官次其年十一月某日葬于常州晉陵
縣仁和鄉北原從遺志也君生四五歲弄泥沙時所作戲輒象道
家法事八九歲弄筆硯時所出言輒類詩家篇章不自知其然蓋
宿習儒立之業明矣弱冠喜道書奉真錄每專氣入靖不粒食者
累歲顛氣充而丹田澤飄然有出世心既壯在家爲長屬有三幼
弟八稚姪嗷嗷慄慄不忍見其饑寒慨然有干祿意乃曰肥遯不

可以立訓吾將業儒以馳名名競不可以怡神吾將體立以育德
凍餒不可以安道吾將強學以徇祿祿位不可以多取吾將知足
而守中繇是去江湖來京師求名得名求祿得祿身榮家給之外
無長物無越思素琴在右黃庭在左澹乎自處與天和終始履仕
塗二十七年享壽命八十二歲無室家累無子孫憂屈伸寵辱委
順而已未嘗一日感感其心顏以至於歸全反真故予所謂達人
之徒歟信矣仲弟湖州長史某以子辱與其兄游既爲同門生又
爲同舍郎周知初終託爲碑記噫先生之道吾能引古以明之銘
曰

漢中大夫東方曼倩夏侯湛高之作廟貌贊唐中大夫真存先生
白樂天知之作神道銘嗚呼二大夫異代而同塗其皆達者乎

唐故通議大夫和州刺史吳郡張公神道碑銘 并序

張之爲著姓尙矣自漢太傅良侍中肱晉司空華丞相嘉以降勳
賢軒冕歷代不乏肱避地渡江始居於吳故其子孫稱吳郡人嘉

以孝悌聞于郡故其所居號孝張里嘉之曾孫裕在宋爲司徒卽
公五代祖也司徒之孫儔在隋爲吳郡都督卽公會王父也台州
臨海令諱鷗卽公之大父也袁州司馬諱孝績卽公皇考也或以
人物著或以婚閥稱迄今爲江南右族公諱擇字無擇未冠丁袁
州府君憂廬于墓晝號而夜泣者三年有靈芝醴泉出焉旣冠好
學能屬文從鄉賦登明經第旣第應制舉中精通經史科補弘文
館校書郎調左金吾錄事換杭州錄事參軍在杭州前後詰僞制
補吏者三十八人駁假年侍老者二十人舉而正之人伏其明會
劉幽求來爲刺史舉課上聞詔受絳州錄事參軍絳之郡丞有主
壻者怙寵侮法豪奪人利公數其罪露章奏之章下丞相姚元崇
奇之致書褒美尋改太原府功曹參軍給事中張昶爲江淮安撫
使表公正直奏署部從事吏部尙書陸象先爲河東按察使狀公
清白奏授懷州獲嘉令以不茹柔得人心以不吐剛得罪繇是左
遷鄂州司馬移深州司馬轉虢州長史時上方思理詔求二千石

之良者時宰以公塞詔擢拜和州刺史公之在郡奉詔條卹人隱
而已不知其他無何水潦害農公請蠲穀籍之損者什七八時李
知柔爲本道採訪使素不快公之剛直密疏誣奏以附下爲名遂
貶蘇州別駕老幼攀泣而遮道者數百人信宿方得去移曹州別
駕歲餘謝病歸老于家天寶十三載正月二十一日終于東都利
仁里私第其年二月十二日葬于河南府伊闕縣中李原享年八
十三噫公生天地間八十有三年可謂壽矣其閒當明皇馭天下
四十有五年可謂時矣有其才得其壽逢其時然職不過陪臣秩
僅至郡守凡所貯畜鬱而不舒嗚呼其命也夫公之文學常爲賀
知章賈彥璿許之公之諒直常爲李邕張庭珪稱之公之政事又
爲劉姚張陸推之夫以八君子之力援之而不足以一知柔之力
排之而有餘阨窮不振以至沒齒嗚呼其命也夫古人云道不虛
行又云其後必有達者故公之子大理評事誠以節行聞于時公
之孫戶部侍郎平叔以才位光于國報施之道信昭昭矣不在其

身則在子孫相去幾何哉長慶二年某月某日平叔奉祖德揭而碑之居易據家狀而銘之其詞曰
有木有木碩大而長破爲桷杙不作棟梁有驥有驥規行矩步辱在短轅不駕大輅嗚呼噫嘻公亦如之將時不我遇而不遇時勿謂已矣天錫多祉既賢其子以濟其美又才其孫以大其門苟無先德孰敢後昆

文粹卷弟五十八

文粹卷弟五十九

吳興 姚鉉 纂

碑十一 總四首

紀功

三受降城碑銘 呂溫

平淮碑 韓雲卿

平淮西碑 段文昌

幽州紀聖功碑銘 李德裕

三受降城碑銘 并序

呂溫

夏后氏遏洪水驅龍蛇能禦大菑以活黔首周文王城朔方逐獫狁能捍大患以安中區若非高岸峻防重門擊柝雖有盛德曷觀成功然則持璿璣而弛張萬象昊穹之妙用扼勝勢以擒縱八極王者之宏圖道雖無外權則有備變化消息存乎其人三受降城皇唐之勝勢者也昔秦不量力北築長城右扼臨洮左馳碣石生

人盡去不足乘障兩漢之後積爲荒邱退居河許歷代莫進矯亡
秦之弊則可矣盡中國之利則未然唐興因循未暇經啟有拂雲
祠者在河之北地形雄坦控扼樞會虜伏其下以窺域中禱神觀
兵然後入寇甲不及擐突如其來鯨一躍而吞舟虎數步而擇肉
塞草落而邊毗懼河冰堅而羽檄走爰自受命至于中興國無寧
歲景龍二年默啜強暴瀆鄰構怨掃境西伐漠南空虛朔方大總
管韓國公張仁愿躡機而謀請築三城奪據其地跨大河以北嚮
制胡馬之南牧中宗詔許橫議不撓時唐休璟建議非之於是留及瓜之戍
斬姦命之卒六旬雷動三城岳立以拂雲祠爲中城東西相去各
四百里過朝那而北關斥候迭望幾二千所損費億計減兵萬人
分形以據同力而守東極于海西窮于天納陰山於寸眸拳大漠
於一掌驚塵飛而烽火耀孤雁起而刁斗鳴涉河而南門用晏閒
韓公猶以爲未也方將建大旆提金鼓馳神竿鞠虎旅看旄頭明
滅與太白進退小則貢琛費受厥角定保塞一隅之安大則倒狼

居竭瀚海空苦寒萬里之野大略方運元勳不集天其未使我唐
無北顧之憂乎厥後賢愚迭任工拙異勢剛者黷武柔者敗律城
隳險固寇得凌軼或驅馬飲河而去或控弦剿壘而旋吾知韓公
不瞑目於地下矣今天子誕敷文德茂育羣生戢兵和親北狄石
旌然而軍志有受降如敵大易有安不忘危崇墉言言其可弛析
亦宜鎮以元老授之廟勝俾述舊職而恢遺功外勤撫綏內謹經
略使其來不敢仰視去不敢反顧永誓猛氣無生禍心聳威馴恩
禽息荒外安固萬代術何加焉敢勒銘城隅庶儆復隍而光烈不
昧銘曰
韓侯受命志在朔易北方之強制以全策亘漢橫塞揭茲雄壁如
三鬪龍躍出大澤並分襟帶各閉風雷俯視陰山仰看昭回一夫
登陴萬里洞開日晏秋盡纖塵不來時惟韓侯方運神妙觀釁則
動乃誅乃弔廓乎窮荒盡日所照天平未贊不策清廟我聖耀德
罷肩北門優而柔之用息元元曷若完守推亡固存于襄于夷永

裕後昆

平淮碑并序

韓雲卿

惟唐上元辛丑歲叛臣劉展竊地弄兵悖撓天常肆虐黎人淮泗而南施于閩越人殘令絕職貢不修先皇帝命我特進試鴻臚卿兼御史中丞田神功統盧龍勁卒控弦引鏑萬有餘騎涉淮浮江梟懸魁逆布宣德澤返旆河南吳楚之人父子相歡戚屬相賀土壤耕闢年穀豐登舳舻若飛歲月相屬朝廷甄收顯寵荐及出領方面入秉端揆錫圭分社有土為王牧守遠近耆耄農桑工賈飲惠懷德皆願銘石江澗播垂休烈其辭曰

昔在上元中夏猶虞姦兇矯攘鯨毒楚吳帝命信都偏師萬人鐵騎騰凌風行雲奔頓旗偃節敦諭威德兇慝不悛搖蕞恃毒桓桓信都奮髯提戈援桴軍門氣凌山河地祇號風江靈鼓波上殞髦頭下除巴蛇通地之經導天之和人胥已安積十餘年田野豐穰轉漕如川伊昔有周召虎方叔降及嬴秦翦起繼躅履險成功孰

與為足天子是咨南人是懷享國冀都銘功海門陵谷可遷碩德長存

平淮西碑

段文昌

夫五兵之設本以助文德而成教化故聖人不專任之其有桀驚暴邪干紀作孽道德不服則兵以威之文告不諭則兵以靜之在禁暴除害而已自黃帝堯舜不能無誅至湯武受命武功寢盛其本之以仁義行之以弔伐惟帝與王率由茲道於戲創業之君勞而後定守文之主安而忘戰故三代之衰功在五伯未有中葉之後再安生靈前古所無歸于聖代我唐運之興也高祖太宗以仁義之兵除暴隋之亂戎功祖武百代丕承立宗嘗亦內翦姦邪外清夷狄所以繼文之代協帝之明既而禍起於微亂生於理由是醜魄之衆結固於兩河斤斧不用縣歷于五紀肅宗代宗親翦大憝且務生育德宗順宗觀于天象察于人事以理運未至沴氣猶凝運啟昇平以俟後聖惟我后握樞出震端展向明考上玄之心

思祖宗之意掃滌區宇光啟帝圖不以萬乘為尊四海為富尊大
禹櫛風之志有光武乙夜之勤以為景擒七國而漢氏安成翦三
監而周化洽焉有患難未去而德教可興日者惠琳恃近狄之固
劉闢憑坤維之險李錡保長江之衝從史資太行之阻四兇相扇
繼為亂常三數年間盡膏鈇鑕太尉茂昭以中山之地盡室來朝
司空弘正以全魏之邦舉宗向闕義風所激莫不歸心況彭城從
折簡之召橫海展執珪之覲向談虞虢之存亡議輔車之形勢莫
不剗心斷臂繼踵為忠既而麟見於巴賈之閒河清於鄘衛之際
固同本之貺昭聖祚之符廓清寰海兆於此矣而長淮右地連山
四起控扼吳楚密邇輶轅有上帝濯龍之池同冀方多馬之國戈
鋌雪照駟駿雲屯二姓三兇憑阻作孽歲在甲午吳少誠積禍而
斃餘殃聚於逆嗣氛祲淮瀆我后方弔人省冤墾災除穢猶命使
者持節往申寵賻以柔服之義示含弘之仁元濟劫衆拒境滔天
肆逆剽葉縣燒舞陽侵襄城伊洛之閒騷然震恐乃詢廷議咸願

假以墨經授以兵符天子淵默以思霆馳以斷獨發宸慮不詢衆
謀漢宣從屯田之議晉武決平吳之計至聖不惑羣疑自消於是
會鳧藻之師得鷹揚之帥以中軍帥李光顏往者平朔邊靜庸蜀
雙矛電激孤劔颺馳亦由馮異之總軍鋒子顏之將突騎才氣雄
武可掃欃槍總魏博河陽邵陽凡三軍自臨穎而前以河陽軍帥
烏重胤當從史內訛邪謀外阻兵勢精誠奮發獨應王師故得虜
魏豹於軍中縛呂布於麾下識慮中正可革梟音益以汝海之地
總朔方義成陝虢劔南西川鳳翔延州寧慶凡七軍由襄陽而進
宣武帥韓弘請以子公武領精卒一萬三千時集洄曲欒書作帥
鍼為戎右充國討虜印統支軍是能從帥之命成父之志又以壽
春守李文通夙精戎韜累習軍旅明於守備可保金湯總宣武淮
南宣歙浙西徐泗凡五軍扼固始之險以鄂岳都團練使李道古
以先曹王皋有任城之武昔征兇渠嘗取安陸授以戎柄嗣其家
聲乘五關之隘以唐鄧隨帥李愬溫敏能斷靜深有謀昔趙孟慕

成季之勲復能霸晉亞夫紹絳侯之武亦克擒吳想其英徽必有
以嗣山南東道荆南凡兩軍自文成而東乃命御史中丞裴度布
挾纊之恩奉如絲之命以諭羣帥以撫輿師且以古之會兵必謀
元帥令歸於一勢不欲分命宣武軍帥韓弘爲諸道行營都統假
陸遜之鉞拜韓信之壇指蹤畫奇正之機發號申嚴凝之令然後
有司馬之法節制之師而寒暑再罹賊巢未下又命內掌樞密之
臣梁守謙肅將天威盡護諸將懸白日於千里推赤心於萬人由
是甘寧奮升城之勇君文勵擊堰之志焚上蔡以翦其翼拔郾城
以扼其吭以軒后攻蚩尤之亂殷宗伐鬼方之罪周公誅淮夷之
叛雖以聖討逆皆三年後定百辟之議且謂久勞將決其機以安
海內復命丞相裴度持淮蔡之節撫將帥之臣分鄧禹之麾旆盛
竇憲之幕府四牡業業于藩于宣先是光顏重胤公武戎旅同心
壘垣齊列長蛇之勢首尾相從發胡騎之雄紛紜縱擊逐餘孽如
烏雀獵殘寇似狐狸干矛杖行次于洞曲丞相之來也羣帥之志

氣逾厲統制之號合益明勢如雷霆功在漏刻賊乃悉其精騎以
備洞曲之師唐隨帥李愬新總傷痍之軍稍厲奔北之氣城孤援
絕地偏勢危而能養貔虎之威未嘗矍視屈鷲鳥之勢不使露形
是以收文成柵而降吳秀琳下與橋而擒李祐祐果敢多略衆以
留之或謂蓄患不利吾軍愬誠明在躬秉信不撓爰命釋縛授之
親兵祐感槩之心出於萬死縱橫之計果效六奇粵十月旣望陰
凝雪飛天地盡閉愬乃遣其將史旻仇良輔留鎮文城備其侵軼
命李祐領突騎三千以爲鄉導自領中軍三千與監軍使李誠義
繼進又遣其將田進誠領馬步三千以殿其後郊雲晦冥寒可墮
指一夕卷旆凌晨破關鋪敦淮濱仍執醜虜雖魏軍得田疇爲導
潛出盧龍鄧艾得田章先登長驅緜竹用制奇勝與古爲儔四紀
逋誅一朝蕩定攄宗廟之宿憤致黎庶之乂安周漢以還莫斯爲
盛帝命策勲進弘爲侍中光顏重胤並爲司空愬爲左僕射帥山
南東道公武加散騎常侍節制鄜坊丹延道古進御史大夫文通

加散騎常侍王師獲金爵之賞環境蒙優復之恩掩骼埋胔除瑕
宥罪躋羣生於壽域還比戶於可封東西南北無思不服丞相旋
請來朝後加金紫光祿大夫封晉國公乃眷淮瀆蒸人生殖俾擇
循吏撫其疾傷以宣慰副使刑部侍郎馬總領淮蔡之任天子議
功雲臺追美將帥俾刻金石以揚休勲而百辟僉謀羣帥克讓推
義士之志敢貪天功徵賢臣之言實在君德於是搢紳之士暨侯
服之臣上獻鴻名式昭徽策然後光輝千古聲明百蠻詔命掌文
之臣文昌勒銘淮浦庶乎閱周雅者美宣王之中興觀劍銘者戒
蜀川之恃險銘曰

天有肅殺萬物以成雷風為令霜霰為刑君有武節四海以寧陳
之原野阻以甲兵在昔聖王格靈邦國武以禁暴刑以助德牧除
害馬農去蠱螫苟非戎功孰靜羣慝明明我后神筭精微九重獨
運千里不違宵衣旰食再安中寓始翦朔漠旋梟蜀虜丹徒縱漚
白門縛布服茲四罪豈勞一旅淮夷怙亂四十餘年長蛇未翦寰

宇騷然逮于孽童逆志滔天懷柔匪及告諭罔悛帝念生人乃申
薄伐飛將鷹揚前鋒電發齋壇命信靈旗指越我武惟揚妖氛未
滅集于洞曲決戰摧兇豹略臨晉維留沓中桓桓攘帥應變無窮
浮罌暗渡束馬潛攻合以長圍絕其飛走布德滅妖升城獲醜商
不改肆農安其畝洞曲殘兵投戈束手帝嘉羣帥賞不踰時畫社
啟封珪組陸離洎于蠻貊服我英威刻之金石作戒淮夷

幽州紀聖功碑銘

并序

李德裕

幽州盧龍軍帥檢校左僕射張公仲武往年修獻捷之禮今歲有
銘勲之請二者君子韙之豈不以諸侯有四夷之功獻其戎捷春
秋舊典也宗周納肅慎之貢銘於楛矢天子令德也斯可以為元
侯表可以為後代法聖上嘉其動而中禮乃命宰臣採其元功傳
於惇史臣德裕乃敢颺言曰夫兵者所以除暴害也愛人則惡其
為害禁暴則惡其為亂雖叡智不殺化之以神至德允懷招之以
禮然書有狝夏之戒傳有循刑之訓虞舜四罪乃成大功文王一

怒以至無侮非德教之助歟仁聖文武章天成功神德明道大孝
皇帝熙我文典煥乎光明極象外之微臻於至道鼓天下之動致
於中和慮必鉤深退而藏密故能神幾獨照伐未兆之謀威光遠
震制不羈之虜當其時也烽燧迭警羽書狎至人心大搖羣帥沮
氣皇帝以軒后之威神漢高之大略光武之雄斷魏祖之機權合
而用之以定王業此議臣所以不敢望於清光也倬哉天地應而
品物生君臣應而功業成故龍躍而雲從鶴鳴而子和方叔伐獫
狁蠻荆來威安遠擊車師西域震服宜有良將殿于朔邊張公禮
悅戰器書成傳癖張仲孝友子儒塞泉流落不耦光景未耀明主
雅聞奇志持印而拜將軍遙推赤心築壇而命元帥拔自雄武授
之薊門果能精誠奮發策慮偪臆千里獻籌一心憂國則知龍顏
善將任人傑而不疑日角好謀歎敵國而強意回鶻者本北狄之
裔也或曰獯狁或曰山戎五帝所不能臣三王所不能制前史載
之悉矣暨薛延陀之敗也酋帥吐迷度率衆款塞太宗幸靈武納

降立回鶻部落置瀚海都督因我封殖遂雄北方肅宗之戡內難
也葉護以射鵰之士親扈戎旌亦由羌髻率師以翼周北貊梟騎
以助漢既滅大憝乃疇厥功特拜葉護司空歲賜緡二萬匹厥後
飾宗女以配之立宮室以居之其在京師也淫祠雲構甲第棊布
棟宇輪奐衣冠縞素交利者風偃挾邪者景附其翎侯貴種則被
我文績帶我金犀悅和音厭珍膳蝸蠹上國百有餘年既而桀驚
無親天命不祐僭侈極欲神道惡盈本國荐饑畜產耗半黠戛斯
蹙因利乘便遂焚龍庭墟落蕭條陰燐青熒今之烏介可汗亡逃
失國竊號沙漠非我策命自爲假王其來也羨漫陰山睥睨高闕
立塞之下氛霧蔽天質貴主以前驅依大國而求援或勾我米糒
救其饑人或邀我甲兵復其故地外雖柔服內有桀心因行人致
辭徵呼韓故事願居光祿塞急保受降城其下有二部曰赤心宰
相那頡啜特勒赤心者天性忿鷙戎馬尤盛初與名王噶沒斯首
謀內附俄而負力怙氣潛圖厲階爲噶沒斯所招誘以俱謁可汗

戮於帳下其眾大潰東偏漁陽上乃賜公璽書授以方略公以室
韋悍亟之兵近我邊鄙俾其偵邏且禦內侵尋以徵役不供爲虜
所敗由是介馬數萬連亘幽陵伏精甲於松栒布穹廬於磧鹵散
若飛鳥止如長雲火燎于原不可嚮邇公激義氣以虹貫發精誠
而石開奇計兵權密授髦雋乃命介弟仲至與裨將游奉寰王如
清左敵萬李君慶張自榮高守素李志操率銳兵三萬建旆而前
介胄雪照戈矛林植命以義殉壯由師直聲隆隆而未洩欲逐逐
而不食戰以聽命嚴而有威公曰險道傾仄且馳且射胡兵所以
無敵也致之平原勒以方陣我師可以逞志也於是據於莽平環
以武剛首尾蛇伸左右翼張輕騎旣合奇鋒橫驚如摧枯株如搏
畜兔攝讐者弗取陸梁者皆仆虜侯王貴人計以千數然後盡眾
服聽悉數係纍谷靜山空靡有子遺橐駝馱風澤而散旃牆芻
幕布野畢收馬牛幾至於谷量虜血殆同於川決徑路寶刀祭天
金人奇貨珍器不可殫論乃命從事李周瞳馳傳上奏又命牙門

將國從玘繼獻戎俘皇帝受而勞之羣臣畢賀昔長平七征驃騎
六舉寶憲合氏羌之衆陳湯檻城郭之兵或生靈滅耗士馬痛傷
或邀功救罪矯命專征然猶告類上帝薦功清廟顧視二漢不其
惡歟以公威動蠻貊功在漏刻因命公爲東面招撫回鶻使先是
奚契丹皆有虜使監護其國責以歲遺且爲漢謀自回鶻嘯聚靡
不鳴張公命裨將石公緒等諭意兩部戮回鶻八百人雖介子討
罪於龜茲班超行誅於鄯善未足傳也回鶻又遣宣門將軍等四
十七人詭辭結歡潛伺邊隙公密賂其下盡得陰謀且欲馳入五
原大毆雜虜公逗遛其使緩彼師期竟得人病馬瘠縮劍而退挫
銳解紛繫公善計今烏介自絕皇澤莫敢近邊并丁零以圖安依
康居而求活盡徒餘種屈意黑車寄託遠遁流離饑凍黑車亦倚
其威重迫脅諸戎造謀籍兵解仇交質自謂約賞深入漢將取而
未期渡幕輕留王師往而非利公以壯猷遠御長計羈縻不媮避
嫌之便終盡致敵之術將時動而得雋豈歲數而勝微矧乎明主

杖將帥為爪牙視戎狄為鼠彘方獵猛敵不翫細娛非周宣無以
成召虎之勲非漢宣無以聽營平之計助哉上將光我中興公前
後受降三萬人特勒二人可汗姊一人都督外宰相四人其他侯
王騎將不可備載王褒以日逐歸德稱為人瑞班固以稽落蕩寇
大振天聲孰若天子神武百蠻震懼乘其蹙困臨以兵鋒刈單于
之旗納休屠之附非萬里之伐無三年之勤魏乎成功輝焯後代
宜刻金石以揚鴻休銘曰

大和之初赤氣宵興開成之末彤雲暮凝異鳥南來胡滅之徵北
夷颺掃厥國土崩偪迫遷徙震我邊鄙長蛇去穴奔鯨失水上都
薊門兵連千里曾不畏天猶為驕子勾我邊穀邀我王師假我一
城建彼幡旗歸計強漢郅支媮辭狼顧朔野伏莽見羸雁門之北
羌戎雜處澌澌羣羊茫茫大鹵縱其鼻騎驚我牧圍暴若豺狼疾
如風雨皇赫斯怒羽檄徵兵謀如泉默斷乃雷聲沈機變化動若
神明沙漠之北虜無隱情漁陽突騎燕歌壯氣赳赳元戎眈眈虎

視金鼓誓衆干旄蔽地爰命介弟屬之大事翩翩飛將董我三軍
稟兄之制代帥之勤威略火烈胡馬星分戈迴白日劒薄浮雲天
街之北旄頭已落絕轡之野蚩尤未縛俾我元侯恢弘遠略取彼
單于係之嶽索陰山寢烽亭微橐弓萬里昆夷九譯而通蠻夷既
同天子之功儒臣篆美刊石垂鴻

文粹卷第五十九

文粹卷第六十

吳興 姚鉉 養

碑十二 總八首

家廟

唐光祿大夫檢校太尉兼中書令成都尹劔南西川節度

副大使知節度事兼管內支度營田觀察處置統押近

界諸蠻夷西山八國雲南安撫等使上柱國南康郡王

贈太師韋公先廟碑銘

權德輿

唐金紫光祿大夫守司空同中書門下平章事充太微宮

使上柱國燕國公子公先廟碑銘

韓雲卿

唐丞相贈太子太師崔公廟碑銘

唐淮南節度使檢校尚書右僕射趙郡李公家廟碑銘

白居易

唐宣武軍節度副大使檢校禮部尚書令狐公先廟碑銘

唐興元節度使王公先廟碑銘

唐魏博節度觀察使沂國公田公先廟碑銘

韓愈

唐河陽軍節度使烏公先廟碑銘

唐光祿大夫檢校太尉兼中書令成都尹劍南西川節

度副大使知節度事兼管內支度營田觀察處置統

押近界諸蠻夷西山八國雲南安撫等使上柱國南

康郡王贈太師韋公先廟碑銘

并序 權德輿

萬物本乎天人本乎祖乃立宗廟以安神明德厚流光追養繼孝
順而下之曰義等而上之曰仁國家稽合禮文損益前載崇功貴
仕得祠四室於王制酌諸侯二昭二穆之義於祭統見君子盡志
盡物之誠惟太尉中書令南康郡王懿文經武保合昌運左右德
宗格于皇天始恢隴坻之旅終化岷峨之俗貴為上公位極元台
克肆忠力乃圖孝享作新廟于京師大安里古者揚其功烈銘于

祭器近古以魯鍾衛鼎追琢先德不若鏤文字於麗牲之碑之為
詳也乃謹而書之云公姓韋氏京兆杜陵人自扶陽重侯用經明
至宰相後裔蕃昌德與位偕積十六葉至六代祖範字元禮以字
行於代仕周為車騎大將軍入隋為沂州刺史啟土郿城易名曰
莊實生孝恪雅有文憲武德初由侍御史為洛州別駕生司農府
君諱機為第一室端誠正志休有厥聲專對出疆艱貞復命著西
征記以獻太宗嘉之剖符澶州修起儒術三典卿曹陟降屯夷操
持貴倖不避疆禦繕理宮室得其時制史氏書之為唐名臣以夫
人隴西郡君辛氏配司農生坊州府君諱餘慶為第二室清和修
絜履道不回歷右驍衛兵曹參軍以至二千石以夫人武功蘇氏
配坊州生贈太子少保府君諱嶽為第三室方巖貞幹政事修明
在武后時以直忤旨由太原令移佐睢陽出入四紀績宣中外歷
殿中監剖符八州盧海潮號眉徐衛陝所至之邦有威有懷凡再
追命以夫人扶風郡夫人竇氏配少保生贈太子太師府君諱賁

爲第四室盛德循行含章自牧歷藍田尉淑聲流聞上纂崇厚下
貽風訓凡三追命以夫人涼國太夫人段氏配噫嘻自扶陽至郢
城積丕烈於前史自考廟至顯考廟流熾昌於後葉列於禘嘗儲
厥義方故南康郡王苞五常貞四教秉靈傑出含道中立初誓偏
師建奇功扞大患立大節以儒衣法冠授律鑿門佩亞相之印綬
修元侯之節制就加宗工入掌金吾撫征全蜀命賜備厚由地官
轉天官參總端右平章宰政進中書令加司徒太尉鉞鉞拒鬯鑾
旂瑀戈有嚴有翼乃蔚乃赫忠厚博大以阜俗信廉仁勇以成師
南蠻納邸西羌解辨象胥譯戎捷樂府陳夷歌守正持重推誠畢
力開地通道者九千餘里生聚教訓者二十一年天文紀功刻在
金石暨德宗棄天下太上居諒闇危言急病體國忘身毅然君子
之道卓爾大臣之節永貞元年秋七月考終命于理所策贈太師
有司奏謚曰忠武公自廟成距今凡八年矣以公天子守臣安危
注意不得視滌濯承吉蠲而元兄國子司業聿實奉朝請薦其常

事孝友而才稱於士林初公之仲兄曰暈屯田員外郎贈鄧州刺
史叔氏曰肇太子左庶子兼御史大夫贈左散騎常侍咸以器望
而延襄錫公之夫人贈魏國夫人張氏其祖禰與外王父皆秉國
鈞爲天下華腴嗣子工部員外郎行立銜恤無怙齊喪中禮大凡
四廟之支旁尊羣從烜赫昭融不可勝書至若質明光近沐浴盛
服虛中以理嘉薦匪懈而無違心太禧沈齊馨香條鬯旣思其志
意若聞乎容聲洞洞乎屬屬乎有以見舉十倫而備百順昔素王
云以戰則克祭則受福其斯之謂乎司業悼手足之凋落感春秋
以悽愴永懷明發俾篆斯文銘曰
新廟有恤靜深奕奕孝孫匪懈玄袞赤舄洪闕章章乃侯乃王漢
稱扶陽唐有南康二十三葉沛然蕃昌四室崇崇斯焉享嘗烈烈
南康溫良能斷謀猷樽俎文武楨榦汧岐之西禋沚銷散井絡之
下天文昭煥撫封全歸冥冥德輝聿修孝享家法無違以昭以穆
以嗣以續和氣婉容苾芬烹熟子孫小大罔不祇肅神之聽之報

以介福

唐金紫光祿大夫守司空同中書門下平章事充太微

宮使上柱國燕國公于公先廟碑銘

并序

國朝之制二品已上祠四廟三公品第一雖有始封亦不敢逾焉
元和五年相國司空燕國公立新廟於京師蘭陵里司空公以文
武偉才肆勤納忠外貞師律入作公相以平乎水土以調乎陰陽
深惟祖禰尊尊之義昭穆親親之道乃圖廟食以永代德公姓于
氏河南人七代祖謹後魏柱國大將軍周太傅三老燕國文公六
代祖寔周大左輔隋贈司空燕國安公五代祖象賢驃騎大將軍
會昌定公惟三葉有大勲力于北朝乞言而為惇史體國以書功
公四代祖益州郫縣令諱德威夫人京兆韋氏曾祖緜州顯武縣
令諱玄範夫人北海唐氏王父贈刑部尚書諱汪夫人北海王氏
烈考贈司空諱夏夫人邠國太夫人京兆韋氏凡宗廟之數郫縣
為初室顯武為二室尚書為三室司空為親室其配各以夫人氏

交神明之道也惟郫縣顯武遵道服儒廉退潔修且曰邠曼容陳
仲弓吾之師也故仕不過六百石而以理效聞尚書沈冥善閉含
道特立以處士燕居至于沒身凡三追命至大司寇先司空廣大
而靜默恭儉而好禮合二雅循四教推明理古之學貶絕非聖之
書恬智交養龜頤不惑起家益州東陽主簿四徙官至寧州真寧
縣令又再轉至泗州司馬祿至卑而仁及物道未泰而志不懾公
卿大夫之間尊有道而疏利權天寶末宰執擅朝惡其剛介不附
己故官止郡佐而慶延身後朝典加恩亦三追命自密州刺史吏
部尚書以至于論道焉長子頌專良有士行終洋州司戶參軍眾
子頌貞幹強敏程功賦職歷戶部侍郎以公事貶泉州司戶贈楚
州刺史幼子頌吏理清明仕至長安縣尉司空公即第三子也英
朗閱達剛方博厚才可以扞大患學可以析羣疑彌綸中朝則尚
書郎京邑廷尉皆有懿績惠綏外服則湖蘇號陝二千石察廉克
宣功化繇山南東道節度使平章事入覲居中策拜顯尊紹文公

安公之爵地展盡志盡物之誠敬悽愴忱惕精明吉蠲詩云春秋
 匪懈享祀不忒司空當之矣又曰以妥以侑以介景福先公宜之
 矣又狀先公之行其大略曰孔宣父應聘歷國困而老于洙泗我
 先君宦學於天寶之年而操之者甫忠謂林甫先君能無窮乎又
 曰小子不敏不通先君之大道不識先君之大行不肖之罪也類
 是者千餘言其太史公自序之風可以論譏酌之祭器德與外王
 母公之從母也故其門中風訓獲周知之忝備重任在公下列公
 以廟銘見授頓伏上聞尊嚴咫尺實奉面命其在傳信不敢曼辭
 銘曰

燕文三老弼魏佐周安公定公亦播厥猷邠縣顯武一同丕矩尙
 書司空三命追崇義訓忠教公台焜耀乃封故地乃建新廟新廟
 是宜羶薌告祠齊明盛服乃順乃時卑靜以正如親聽命求福不
 同孝孫之慶刻銘斯碑以代烝彝

唐丞相贈太子太師崔公廟碑銘 并序 韓雲卿

戊申歲六月尙書左僕射趙國公圓薨天子罷朝三日喪禮贈賻
 加異常數詔贈太子太師諡曰昭襄嗣子襄遵荷先訓敦率舊禮
 五月而葬二十五月而祥始立廟洛邑曰考廟王考廟階二丈有
 七寸從四尋衡八尋三戶五楹外垂四阿坊塋彩繪施以丹雘齋
 宮爨室庭垣稱之因述族氏勳蹟清顯銘其德曰
 太師崔氏河東武城人也系于齊著于漢荷先少師之教純孝溫
 重稟受元和緯文經武爲國梁柱賊臣祿山憑犯河華玄宗順動
 南遊蜀漢公爲居守有扶掖再造之勲函洛阻絕人罹蠱毒肅宗
 振旅朔陲殲靜禍亂公爲宰衡有翊贊戡復之謀山越之難河泗
 之境公領揚州宜風淮楚有翦攘威鎮之績茂勲盛業疇爲公比
 禮曰以勞定國則祀之能禦大災則祀之能捍大患則祀之是宜
 廟食以銘于鼎以某月之某日寢廟既成庭除既平備器潔服儉
 而中禮先饗七日致齋具物水草陸產醴酪牲牲之備外盡物也
 色溫行宛身屈意愉如懼不及內盡志也禮卒奠撤齋莊之色如

存焉歎息之音如聞焉君子曰吾觀崔氏之享有以知禘嘗之義焉古者諸侯立五廟有鼎與樂有國之制侯伯有爵而無土廟有鼎祭有樂不克立五廟而立三廟不銘于鼎而銘于碑其銘曰顯顯太師天孕鴻才恢張碩勳輝輝衡台惟昔姦兇蝕恩犯順乘時無虞區宇駭震立宗南巡功著巴岷肅宗戡復勳揚策贖銷殄氛禳宣明日月於惟太師誰將比烈爰自鼎司出鎮淮夷外有亂虜內有疑師欽和畏威遠邇來思於惟太師為國藩維功以殲災勞以定國詳考祀典禮存廟食爰立寢廟不忘儉易卑不狹陋廣不踰制聖聖孝子愉愉其志齋莊懋誠庶物臻備俎豆斯設神將來暨歲時迭移霜露薦至德流慶延昌庇後嗣爰自以下百四字從嘉靖校本補入

唐淮南節度使檢校尚書右僕射趙郡李公家廟碑銘

白居易

王建侯侯建廟有器器有銘所以論譏先德明著後代或書于鼎或文于碑古今之通制也維開成某年某月某日宣武軍節度

使檢校尚書右僕射汴州刺史上柱國賜紫金魚袋趙郡李公齋沐祇慄拜章上言請立先廟以奉常祀於是得請于天子承式于有司是歲某月某日經始于東都明年某月某日有事于新廟外盡其物內盡其志三獻百順神格禮成其友居易以李氏宗祖世家名爵按唐書宰相世系表趙郡李氏有南祖西祖東祖之別與僕射志行官業書于麗牲之碑謹按家略九代祖善權後魏譙郡守八代祖延觀徐梁二州刺史七代祖續馬頭太守六代祖顯達隋潁州刺史五代祖遷皇朝宜穀二州別駕贈德州刺史高祖孝卿右散騎常侍贈鄧州刺史曾祖府君諱敬立總章儀鳳間歷吏部侍郎同中書門下三品中書令弘文館大學士監修國史封趙國公諡曰文憲才智職業載在國史今祭于第一室以妣蒯國夫人范陽盧氏配焉王父府君諱守一屬世難家故不求聞達避榮樂道與時浮沈終成都府郫縣令祭于第二室以妣滎陽夫人鄭氏配焉先考府君諱晤歷金壇烏程晉陵三縣令府君為人篤於家行飾以吏事動有常度

居無惰容所蒞之邑有善政辭滿之日多遺愛不登貴位其命矣夫今祭于第三室以先妣上谷夫人范陽盧氏配焉府君累贈至尚書右僕射夫人累贈至上谷郡太夫人前後凡三追命六告身渥澤疊洽自葉流根從子貴也鄆縣洎晉陵府君咸善積于躬道屈於位儲祉流慶而僕射生焉僕射名紳字公垂六歲丁晉陵府君憂孺慕號踊如成人禮九歲終制孝養上谷太夫人年雖幼承順無違家雖貧甘旨無闕侍親之疾冠帶不解者三載餘可知也執親之喪水漿不入口者五日餘可知也先是祖妣考妣晉陵府君前娶夫人裴氏洎叔父兄妹之殯咸未歸耐各處一方公在斬縗中親護九喪匍匐萬里及期襄事禮無闕違至誠感神有靈烏瑞芝之應事動鄉里名聞公卿言孝友者以為表率憲宗嗣統三年李錡盜據京口公寓居無錫會擢第東歸錡聞公名署職引用初詢以謀畫結舌不對次強以章檄絕筆不書誘之以厚利不從迫之以淫刑不動將僇辱者數四就幽囚者七旬誠貫神明有死無二言

名節者以為準程朝廷嘉之拜右拾遺歲餘穆宗知公忠孝文行召入翰林特授司封員外郎知制誥遷中書舍人承顏造膝知無不言獻替啟沃如石投水俄拜御史中丞戶部侍郎既而望屬台衡朝當晏駕時移世變遂出掾高要佐潯陽旋為滁壽二州刺史大凡公之為政也應用無方所居必化卧理二郡以去害為先故有盜奔獸伏之感廉察浙右以分憂為功故有郵鄰活瘠之惠尹正河洛以革弊為急故有摘姦抉蠹之威文宗知公全才以汴難理乃授鉞鉞俾鎮綏之初宣武師人驕強狠悍徃亂徼利積習生常公既下車盡知情偽刑賞信惠合以為用一年而下懲勸二年而下畏服三年而下恥格肅然丕變薰然太和撫之五年人俗歸厚至於捍大患禦大災卻飛蝗遏暴水致歲於豐稔免人於墊溺噫微公之力汴之民其為殫乎其為魚乎殊績尤課不可具舉天下征鎮淮海為大非公作帥不足以長東諸侯制加銀青光祿大夫揚州長史淮南諸道節度觀察等使餘如故詔下之日出次于

外軍門不擊柝里巷無吠犬從容五日按節而東百姓三軍挈壺漿捧簞醪遮道攀餞者動以萬輩皆嗚咽流涕如嬰兒之別慈母焉噫若非袴襦之惠及其幼穉豚之養及其老艾推赤心置人腹中者則安能化暴戾之俗一至於此乎西人泣送東人歌迎梁楚千里風變化移膏雨景星所至蒙福于時開成會昌之際上方致理公未登庸願願蒼生環望而已盛矣哉大丈夫生於世也以忠貞奉乎君以義利惠乎人以黻冕貴乎身以宗廟顯乎親以孝敬交乎神宜其荷百祿輔一德為有唐之宗臣者歟君子謂李氏之廟也休哉公之祭也順哉然曰有孫如此有子如此可謂孝矣故其碑銘云

祭祀從貴爵土有秩諸侯之廟一宮三室皇皇西室皇祖中書孝孫追遠昭穆有初顯顯中室王父邨令順孫祇享盡敬肅肅東室先考晉陵嗣子奉薦孝思蒸蒸嗣子其誰僕射公垂公垂翼翼齋嚴諒直為子為臣有典有則載膺休命載踐右職以孝肥家

以忠肥國乃授侯伯纛鉞旂戟乃饗祖禰牲牢黍稷家聲振耀國典褒飾六命徽章三世血食光大遺訓顯揚先德子孫承之垂裕無極

唐宣武軍節度副大使檢校禮部尚書合狐公先廟碑

銘并序

劉禹錫

今上元年七月十三日汴州刺史宣武軍節度副大使知節度事汴宋亳等州觀察處置使銀青光祿大夫檢校禮部尚書兼御史大夫上柱國彭陽縣開國伯合狐公西嚮拜章上言守臣楚蒙被恩澤列為元侯得立家廟以奉常祀制書下其奏于有司於是善相考察祥得地于京師通濟里居無何新廟成公以守藩故申命季弟監察御史定卜牲練日越八月丁亥附饗三室埒墉以尚幽設幄以迎精禮無尤違神用寧謚第一室秦州上邽縣尉諱濬以妣太原王氏配第二室絳州昌明縣令贈吏部尚書諱崇亮以妣贈太原郡夫人河東柳氏配第三室太原府功曹參軍贈司空諱承

簡以妣贈魏國太夫人富春孫氏配明年十月公由浚郊以介圭
入覲真拜戶部尚書進爵爲魯侯既辭戎旃得以列侯謁三廟是
歲南至上不視朝又得以時展祭先期致齋栗然以敬既齋盡志
歆然永思奉其百順陳以具物始躋而虔恭終獻而沈瀾既卒事
顧麗牲之石宜有刊紀乃俾家老授其牒于所知云合狐晉邑也
晉大夫魏顥以輔氏之功始封焉其易名曰文國語所謂合狐文
子是也其先周文王之昭畢公高之裔畢萬爲晉卿始封于魏自
萬至顥蓋四世其後三十七世藍田侯虬仕拓魏爲燉煌郡太守
子孫因家遂占數爲郡人藍田之孫熙在隋爲納言惟上邽府君
納言之玄孫道克肖而位不至惟尚書府君西州之右族光未耀
而德已基惟司空府君志爲君子儒以經學居上第調補安陽縣
主簿歷平正縣尉汾州司法參軍陝州大都督府兵曹終于太原
府首掾始以顥經進既仕旁通百家愛穀梁子清而婉左邱明國
語辯而工司馬遷史記文而不華咸手筆朱墨究其微旨愷悌以

肥家信誼以急人德充齒耄獨享天爵故休祜集于身後徽章流
乎佳城凡以子貴承澤降命書告第者始贈尚書祠部郎中再贈
禮部尚書三加右僕射四進太保五爲上公先太夫人亦四徙封
蜜印纍纍邦族聳慕生三子皆才彭陽爲嗣次子從端實肅給令
爲檢校膳部郎中參河東軍事季子前所謂爲監察御史今主柱
下方書溫敏而有方綽綽然真令兄弟惟彭陽公以辭筆取科名
翰飛參侍從由博士主尚書牋奏典內外書命遂登樞衡言文章
者以爲冠擁節總戎率身和衆留惠于盟津變風于浚都言方略
者以爲能夫浚師嘆惜難治乘釁竊發寢成習俗莅止五載飲和
革心車馬來朝人皆隕涕問公還期鵬必祝之留爲常伯旋命居
守汴人聞公之東近而愈懷翹翹瞿瞿咸西其首言遺愛者可紀
焉貴而率禮老而能慕忱惕乎霜露齋莊乎廟祧睦其季仲施及
鄉黨言孝悌者歸厚焉勒銘于碑以代彝鼎文曰
已孤之孝莫如備物顯顯新廟四阿三室時惟仲月卜用柔日醮

醴苾芬牲牲肥腍邊甌在堂蕭管在庭孝孫蒸蒸若奉盈低簪
委紳薦俎登鉶肸鬻交感流涕緣纓禮以備儀誠以致美祖考來
格錫之休祉工祝告訖退循軒配乃授風人作詩以紀猗歟彭陽
之寵光佐憲皇穆穆皇皇西省東臺迭為侍郎國之大柄咨爾平
章敬宗凝旒俾鎮雍邱入為地官今守東周彭陽之忠厚宜介福
以壽東郊既釐可復朝右縣縣其胃系于周舊由我顯起必昌其
後大和紀元作廟之首刻碑廟門龍集已酉

唐興元節度使王公先廟碑銘

并序

唐制五等有爵服而無山川登于三事得立四廟備物崇祀以交
神明敬先報本以輔孝治有國之令典也惟長慶三年前相國王
公始卜廟于西京崇業里公時鎮劍南東川上章曰臣涯官秩印
綬品俱第三請如式以奉宗廟制曰可是歲仲冬申命長男孟堅
祔其主于三室明年公入為御史大夫復以十一月躬行絜祭間
歲公出梁州就拜司空禮崇異數廟加祀室大和二年增新室既

成祔顯考於尊位告饗由禮觀之者以為世程第一室上儀同幽
州別駕府君諱元政以妣博陵崔氏配第二室湖州安吉縣令贈
尚書刑部員外郎府君諱實以妣贈扶風縣太君馬氏配第三室
朝散大夫青州司馬贈戶部侍郎府君諱祚以妣贈武威郡太夫
人賈氏配第四室曰溫州刺史贈太尉府君諱冕一作冕以妣贈魯
國太夫人博陵崔氏配初周王太子晉遇浮邱化為神仙時人號
曰王家其後遂以命氏顯于秦者曰翦三世將秦師子孫分居晉
代聞東漢有徵君霸霸孫甲亦號徵君徙居祁縣為著姓故至于
今為太原人自漢涉魏益以熾昌凡十葉至後魏度支尚書廣陽
侯罔廣陽有二子神念神感神念南奔梁神感北仕齊惟儀同府
君廣陽侯五代孫也唐興于太原實從義旗佐成王業故有開府
儀同之寵惟刑部府君以功臣子理二邑不躋貴仕故有錫羨後
大之祥惟戶部府君幼孤以孝聞于鄉曲未冠以文售于有司由
前進士補延州臨安縣主簿會詔徵賢良策在甲科授瀛州饒陽

尉歲滿遷渭南尉天后在神都而東畿差重遂由渭南轉河陽適
建萬象神宮旬內吏分董其役因上書切諫繇是名益聞開元初
以大理司直馳輶車聯讞大獄閩禹朔漠至止決平早以樂棘傷
生晚成劇恙樂就夷曠故不致大官惟太尉府君生于治平時以
文學自奮年十有五賁然從秋賦明年春昇名于司徒又一年玄
宗御層樓發德音懸文辭政術科以置旄士府君策最高授太常
寺太祝未幾復以能通道德南華沖虛三真經進蓋屋尉天寶中
歷右拾遺左補闕禮部司馬二員外郎屬幽陵亂華遣兵南服因
佐閩粵改檢校比部郎中行軍司馬時中原甫寧江南爲吉地二
千石多用名德乃以府君牧温州朝廷虛公卿以侯高第及聞訃
永嘉人輟春罷社薦紳聞以不淑相弔焉雖位負于道而邁德垂
矩後之人得以纘承丕揚之其儲休啟祐有自云爾生三子皆聰
明絕人長曰沼以神童仕至檢校禮部郎中次日潔以奇文仕至
國子司業今代郡公實季子也早在文仕射策連中咸世其家貞

元中德宗聞其名自藍田尉召入禁中視草厥後三典書命再參
內庭憲宗器之付以國柄翊贊有道雖策免常居大寮今年自梁
州請覲上思用舊臣爲羽儀遂領太常其公府如故以一心事六
君顯官重務靡不敷歷且夫起諸生至三公而心愈卑道益廣出
授黃鉞以臨諸侯入服華章以謁家廟追崇極大位血食備多室
享全榮而奉昭薦嗚呼公侯之孝歟宜書廟器以視喬公之三鼎
其辭曰

闕宇神庭邃清而嚴上公之儀四室耽耽儀以潔牲粢以大糝交
神尙敬合魄尙氣子姪宗工駿奔奉事副笄侈袂儼恪居次孝孫
兢兢執爵而升以裸以濯以伏以興水陸具來羶薌畢登列于圖
方其器增增乃祔乃嘗敬而追遠二昭二穆孝以尊本瞻瞻几幄
蹠蹠堂間禮成起慕涕落玄袞濡露踐霜誰無永懷不如達者哀
與榮偕逢時奮庸誰不得位不如仁人以道爲貴惟公之達兮名
以顯親惟公之仁兮德以澡身六朝之清臣一代之全人宜其世

家翼翼振振罔不肅祗于廟門

唐魏博節度觀察使沂國公田公先廟碑銘并序

韓愈

元和八年十一月壬子上命丞相元衡丞相吉甫丞相絳召太史
尚書比部郎中韓愈至政事堂傳詔曰田弘正始有廟京師朕惟
弘正先祖父厥心靡不嚮帝室訖不得施乃以教付厥子維弘正
銜訓嗣事朝夕不怠以能迎天之休顯有不功維父子繼忠孝子
維寵嘉之是以命汝愈銘欽哉惟時臣愈承命悸恐明日詣東上
閤門拜疏辭謝不報退伏念昔者魯僖公能遵其祖伯禽之烈周
天子實命其史臣克作爲駟駟泮閼之詩使聲于其廟以假魯靈
今天子嘉田侯服父訓不違用康靜我國家蓋寵銘之所以休寧
田氏之祖考而臣適執筆隸太史奉明命其可以辭謹按魏博節
度使銀青光祿大夫檢校工部尚書魏州大都督府長史御史大
夫沂國公田弘正北平盧龍人故爲魏博諸將忠孝畏慎田季安

卒其子幼弱用故事代父人吏不附迎弘正於其家使領軍事弘
正籍其軍之眾與六州之人還之朝廷悉除河北故事比諸州故
得用爲帥已而復贈其父故滄州刺史兵部尚書母夫人鄭氏梁
國太夫人得立廟祭三代曾祖都水使者府君祭初室祖安東司
馬贈襄州刺史府君祭二室兵部府君祭東室其銘曰
唐繼古帝海外受制狎于太寧燕盜以驚羣黨相維河北失平號
登元和大聖載營風揮日舒咸順指令業業魏土嬰兒戲兵吏戎
愁毒莫保腰頸人曰田侯其德可倚叫譟奔趨乘門請起田侯攝
事奉我天明束縛弓戈考校度程提疆籍戶來復邦經帝欽良臣
曰維錫予嗟我六州始復故初告慶于宗以降命書旌節有韜豹
尾神旗囊兜戟纛以長魏師田侯稽首臣愚不肖逮茲有成祖考
之教帝曰俞哉維汝忠孝子思乃父追秩夏卿媿德娠賢梁國是
榮田侯作廟相方視趾見于蒼龜祖考咸喜暨暨田侯兩有文武
訖其外庸可作承輔咨汝田侯勿亟勿遲覲饗式時祖考之思

唐河陽軍節度使烏公先廟碑銘

并序

元和五年天子曰盧從史始立議用師于恆乃陰與寇連夸謾凶
驕出不遜言其執已來其四月中貴人承瓘卽誘而縛之其下皆
甲以出操兵趨譚牙門都將烏公重胤當軍門叱曰天子有命從
有賞敢違者斬於是士皆斂兵還營卒致從史京師壬辰詔用烏
公爲銀青光祿大夫河陽軍節度使兼御史大夫封張掖郡開國
公居三年河陽稱治詔贈其父工部尙書且曰其以廟享卽以其
年營廟于京師崇化里軍佐竊議曰先公旣位常伯而先夫人無
加命號名差卑於配不宜語聞詔贈先夫人劉氏沛國太夫人八
年八月廟成三室同宇祀自左領軍衛府君而下作主于第乙巳
升于廟烏氏著於春秋譜於世本列於姓苑在莒者存在齊有餘
枝鳴皆爲大夫秦有獲爲大官其後世之江南者家鄱陽處北者
家張掖或入夷狄爲君長唐初察爲左武衛大將軍實張掖人其
子曰令望爲左領軍衛大將軍孫曰蒙爲中郎將是生贈尙書諱

承洽字某

按新唐書名承珙字重潤

烏氏自莒齊秦大夫以來皆以才力顯及

武德已來始以武功爲名將家開元中尙書管平盧先鋒軍屬破

奚契丹從戰捺祿走可突于渤海海上至馬都山吏民逃徙失業尙

書領所部兵塞其道塹原累石縣四百里深高皆三丈寇不得進

民還其居歲罷運錢三十萬餘黑水室韋以騎五千來屬麾下邊

威益張其後以耿仁智謀說史思明降思明復叛尙書與兄承恩

謀殺之事發族夷尙書獨走免李光弼以聞詔拜冠軍將軍守右

威衛將軍檢校殿中監封昌化郡王石嶼軍使積粟勵兵出入耕

戰以疾去職貞元十一年二月丁巳薨于華陰告平里年若干卽

葬於其地二子大夫爲長季曰重元爲某官銘曰

烏氏在唐有家於初左武左領二祖紹居中郎少卑屬于尙書不

償其勞乃相大夫授我戎節制有疆墟數備禮登以有宗廟作廟

大都以致其孝右祖左孫爰饗其報云誰其子其有無孫克對無

羞乃惟有人念昔平盧爲艱爲瘁大夫承之危不棄義四方其平

+